

Mbunga: Bible for Matthew

Formatted for Translators

©2022 Wycliffe Associates

Released under a Creative Commons Attribution-ShareAlike 4.0 International License.

Bible Text: The English Unlocked Literal Bible (ULB)

©2017 Wycliffe Associates

Available at <https://bibleineverylanguage.org/translations>

The English Unlocked Literal Bible is based on the unfoldingWord® Literal Text, CC BY-SA 4.0. The original work of the unfoldingWord® Literal Text is available at <https://unfoldingword.bible/ult/>.

The ULB is licensed under the Creative Commons Attribution-ShareAlike 4.0 International License.

Notes: English ULB Translation Notes

©2017 Wycliffe Associates

Available at <https://bibleineverylanguage.org/translations>

The English ULB Translation Notes is based on the unfoldingWord translationNotes, under CC BY-SA 4.0. The original unfoldingWord work is available at <https://unfoldingword.bible/utn>.

The ULB Notes is licensed under the Creative Commons Attribution-ShareAlike 4.0 International License.

To view a copy of the CC BY-SA 4.0 license visit <http://creativecommons.org/licenses/by-sa/4.0/>

Below is a human-readable summary of (and not a substitute for) the license.

You are free to:

Share — copy and redistribute the material in any medium or format. Adapt — remix, transform, and build upon the material for any purpose, even commercially.

The licensor cannot revoke these freedoms as long as you follow the license terms.

Under the following conditions:

Attribution — You must attribute the work as follows: "Original work available at <https://BibleInEveryLanguage.org>."

Attribution statements in derivative works should not in any way suggest that we endorse you or your use of this work.

ShareAlike — If you remix, transform, or build upon the material, you must distribute your contributions under the same license as the original. No additional restrictions — You may not apply legal terms or technological measures that legally restrict others from doing anything the license permits.

Notices:

You do not have to comply with the license for elements of the material in the public domain or where your use is permitted by an applicable exception or limitation.

No warranties are given. The license may not give you all of the permissions necessary for your intended use. For example, other rights such as publicity, privacy, or moral rights may limit how you use the material.



Matthew

1

¹Kihitabu kya ukolu wa Yesu Kilisito mwana wa Daudi, mwana wa Iblahimu. ²Iblahimu awelili tati wa Isaka, na Isaka tati wa Yakobo, na Yakobo tati wa Yuda na walongo ghaki. ³Yuda awelili tati wa Pelesi na Sela kwa Tamali, Pelesi tati wa Hezeloni, na Hezeloni tatiwa Lamu. ⁴Lamu awelili tati wa Aminadabu, Aminadabu tati wa Nashoni, na Nashoni tati wa Salimoni. ⁵Salimoni awelili tati wa Boazi kwa Lahabu, Boazi tati wa Obedi kwa Lusi, Obedi tati wa Yese, ⁶Yese awelili tati wa nkosi Daudi. Daudi awelili tati wa Sulemani kwa mhumbu wa Ulia. ⁷Sulemani awelili tati wa Lehoboamu, Lehoboamu tati wa Abiya, Abiya tati wa Asa. ⁸Asa awelili tati wa Yehoshafati, Yehoshafati tati wa Yolamu, na Yolamu tati wa Uzia. ⁹Uzia awelili tati wa Yothamu, Yothamu tati wa Ahazi, Ahazi tati wa Hezekia. ¹⁰Hezekia awelili tati wa Manase, Manase tati wa Amoni na Amoni tati wa Yosia. ¹¹Yosia awelili tati wa Yekonia na wahaja ghaki lipindi lya kutolwa kuyenda ku Babeli. ¹²Na badili gha kutolwa kuyenda ku Babeli, Yekonia awelili tati wa Shatieli, Shatieli awelili mbuyi wa Zelubabeli. ¹³Zelubabeli awelili awelili tati wa Abiudi, Abiuditati wa Eliakimu, na Eliakimu tati wa Azoli. ¹⁴Azoli awelili tati wa Zadoki, Zadoki tati wa Akimu, na Akimu tati wa Eliudi. ¹⁵Eliudi awelili tati wa Elieza, Elieza tati wa Matani na Matani tati wa Yakobo. ¹⁶Yakobo awelili tati wa Yusufu mngwana wa Maliamu, mweni kuwela kupitila mweni Yesu awelekili, mweni kukemwa Kilisito. ¹⁷Viwelekwa vyogha kuhuma Iblahimu mbaka Daudi viwelili viwelekwa ikumi na njechi, kuhuma Daudi mbaka kutolwa kuyenda kubabeli viwelekwa ikumi na njechi, na kuhuma kutolwa kuyenda ku Babeli mbaka Kilisito viwelekwa ikumi na njechi. ¹⁸Kuwelekwa kwa Yesu Kilisito kuwelili kwa ndumbu hai. Nyongu ghaki, Maliamu, aposilwi na Yusufu, ila pambila gha weni konganika, awonikanili yiwa kana ndumbu kwa uwesa wa Mpumulo wa Sapanga. ¹⁹Mlumi ghaki Yusufu, awelili mundu mweni haki alemili kumpughanyisa lipala lipala. Akalamula kupyata uposu hau kwa kifisu. ²⁰Paawelili akiliwachila kunani gha mighalu hai, Mtumikila wa kundumba wa Bambu akamuhumila kundotu, akilonga, "Yusufu mwana wa Daudi, ukotoho kutila kumtola Maliamu handa muhumbu ghaku, kwaikiva ndumbu yaaweli naye ni kwa uwesa wa Mpumulo wa Sapanga. ²¹Atejiwpola mwana mlumi na wenga utemkema lihina lyaki Yesu, kwaikiva atewalokola wandu ghaki na sambu syau." ²²Hagha hyogha yahumilile kutimiliswa kila kilongelilwi na Bambu kwa njila gha mlota, akilonga, ²³"Ulohi bikila atetola ndumbu na kulela mwana mlumi, na watemkema lihina lyaki Imanueli"-ingumaanisa, "Sapanga pamonga na twenga." ²⁴Yusufu ayimukili kuhuma mlwonu na kughola handa mtumikila wa Bambu amlongilile na akamtola handa mhumbu ghaki. ²⁵Hata nagma awonjili naye ng'ogha mbaka paaiwopolile mwana mlumi na akamkema lihina lyaki Yesu.

2

¹Baadili gha Yesu kuwelekwa ku Betelehemu gha Uyahudi kmachuwa gha nkosi Helode, wandu wasoma kuhuma kumashaliki gha kutali wakahika Yelusalemu wakilonga, ²"Kakugha hayu mweni kuweleka nkosi wa Wayahudi? Tulolile ndondwa ghaki kuhuma mashaliki hinu twenga tuhika kumtundamila." ³Lipindi nkosi Helode pakayoghanila hagha aliholile nesu, na Yelusalemu hyogha pamonga namweni. ⁴Helode akawakonganisa wakulu wa watambika wogha na wayandika wa wandu, namweni akawakonya, "Kilisito atewelekwa kugha?" ⁵Wakamlongela, "Kubetelehemu gha Uyahudi, kwaikiva havi ndiwa iyandikilwi na mlota, ⁶Nawenga Betelehemu, kumlima wa Yuda, kwa msokombi ng'oha paghati gha vilongosi wa Yuda, kwaikiva kuhuma kwa wenga atehika kilongosi atewahunga wandu ghangu Izilaili." ⁷Hinu Helode akawakema wala wasoma kwa kufisa na kuwakonya ni lipindi ghani nesu nesu ndondwa iwelili iwoneka. ⁸Akawalaghila ku Betelehemu, akilonga, "Myendi kwa kulolesa mkamhakuli mwana mweni kuwelekwa. Lipindi pantemlola, mniyegheli habali ili hilahila na nenga niwesi kuhika na kumtundamila." ⁹Badili gha kuwela wamyoghanila nkosi, wayendelelile na mwanja ghau, na ndondwa hila wawelili wakiilola masaliki iwelili ikiwalongola mbaka paigholoka kunani gha mahala pala mwana mweni kuwelekwa aiwelili. ¹⁰Lipindi pawailolile ndondwa, wahekelelile kwa luheku lukulu nesu. ¹¹Wakayingila mkyumba na kumlola mwana mweni kuwelekwa na Maliamu nyongu ghaki. Wakamtundamilila na kumkwinila. Wakawopola ngoku zyau na kumpegha hupo zya zahabu, ufumba na manemane. ¹²Sapanga awakanisili kundotu yiwa wakotoho kuhuyila kwa Helode, Hinu, wakahuya kumlima wau kupitila njila ghangi. ¹³Badili gha kuwela wahuka, mtumikila wa Bambu akamuhumila Yusufu kundotu na kumlongela, "Uyinuki, na umtoli mwana pamonga na nyongo ghaki na mtuwili ku Msili. Mhighali haku mbaka panitewalongela, kwaikiva Helode atemhakula mwana ili amyalamisi. ¹⁴Uhiku hau Yusufu akayimuka na kumtola mwana na nyongo ghaki na kutuilila ku Misili. ¹⁵Alikalili haku mbaka Helode paahovile. Hai itimilisili kila Bambu akilongile kupitila mlota, "Kuhuma ku Misili nimkema mwana ghangu." ¹⁶Hinu Helode, pailolile yiwa kapughanywa na wandu wasoma, akahyoma nesu. Akalaghila kukomwa kwa wana wogha walumi weni kuwela ku Betelehemu na wogha kumahala pala weni kuwela na lipindi lya machuva maivili na pahi ghaki kukovekelana na lipindi awelili kahighilisa kala kuhuma kwa wandu wala wasoma. ¹⁷Haku ndiwa kukawela kutimila kwa lila lilando lyeni kulongelwa na mlota Yelemia, ¹⁸Lilowi liyoghanilika Lamah, kililo na malumbililo makulu, Laheli akiwalilila wana ghaki, na akanili kutaywa moyu, kwaikiva wahuka kala." ¹⁹Helode paahovile, hinu mtumikila wa Bambu akamuhumila Yusufu kundotu haku Misili na kulongela, ²⁰"Uyimuki na umtoli mwana na nyongo ghaki, na myendi kumlima wa Izilaeli kwaikiva wala weni kuwela wakihakula ukomu wa mwana wahova kala." ²¹Yusufu akayimuka, akamtola mwana pamonga na nyongo ghaki, na wakahika kumlima wa Izilaili. ²²Ila pakayoghanila yiwa Alikelau awelili akilongosa ku Yuda mahala kwa tati ghaki Helode, atilili kuyenda haku. Badili gha

Sapanga kumkanila kundotu, akahuka kuyenda kumbwani wa Galilaya,²³ na ayendili kulikala kumlima weni kukemwa Nazaleti. Hai itimilisili kila kila kiwelili kilongwa kala kwa njila gha walota, yiwa atekemwa Mnazaleti.

3

¹Kumachuwa ghala Yohana Mbatisa ahikili akitangasa kumwitu gha Yuda akilonga,² "Mleki sambi kwaikiva unkosi wa kundumba wa pabehi." ³Kwaikiva hayu ndiwa mweni kulongelegelelwa na mlota Isaya akilonga, "Lilowi lya mundu mweni kughuta kuhuma mluvagha; 'myandali njila gha Bambu, mnyoloshi njila zyaki.'" ⁴Hinaa Yohana awelili kavala mapuku gha ngamia na mkanda wa ngozi mkibulubulilo kyaki. Mulyo ghaki uwelili nzige na bhuche gha mwitu. ⁵Hinu Yelusalemu, Yuda yogha, na kumahala kogha kweni kutindila lweni Yoludani wakayenda kwa mweni. ⁶Wawelili wakibatiswa na mweni kumlweni Yoludani kunu wakileka sambi zyau. ⁷Ila paawawonile watangala wa mafalisayu na masadukayu wakihiha kwa mweni kubatiswa, akawalongela, "Mwenga kiwelekwa kya njoka weni sumu ghani kawakanisa muwesi kuwela kutali na mahakilo yeni kuhika?" ⁸Mleli matungula yeni kuwaghola mleki sambi. ⁹Na mkotoho kuliwachila na kulongelana paghati gha mwenga, "Tuvile na Iblahimu handa tati wa wenga." Kwaikiva ninguwalongela yiwa Sapanga anguwesa kumuyinulila Iblahimu wana hata kuhuma kumaganga hagma. ¹⁰Lihuka liyandalwa kala kuvikwa kumikegha gha mibiki. Hinu kila libiki lilela ng'ogha matungula maha lingudumulwa na kutaghwa kulyoto. ¹¹Ninguwabatisa kwa masi kwaikiva gha kuleka sambi. Ila hayu mweni kuhika badili gha nenga ni mkulu kupiti nenga na nenga nipalilwi ng'ogha hata kupapa vilat vyaki. Mweni atewabatisa kwa Mpumulo wa Sapanga na kwa lyoto. ¹²Na luselu lwaki likala kumawoku ghaki kughulula mbandi ghaki na kukungula nganu ghaki kungoku ghaki. Ila atelungusa yala makapi kwa lyoto lyeni kuwesa ng'ogha kujimika. ¹³Hinu Yesu akahika kuhuma ku Galilaya mbaka lweni Yoludani kubatiswa na Yohana. ¹⁴Ila Yohana apalili kumkanisa akilonga, "Nenga ningupala nibatiswi na wenga, na wenga unguhika kwa nenga?" ¹⁵Yesu akayanga akalonga, "Ujumili iweli nagha hinaa, kwaikiva ndiwa ingutupala kutimilisa haki hyogha," Hinu kuulongo Yohana akamlekesela igholwi nagha. ¹⁶Badili gha kuwela kabatiswa kala, bwitu Yesu akahubhuka kumasi, na uloli, Kundumba kukagubutuka kwa mweni. Na akamlola Mpumulo wa Sapanga akihuluka kwa mlandanu wa ngunda na kuhulukila kunani ghaki. ¹⁷Uloli, lilowi likahumila kuhuma kundumba likilonga, "Hayu ni mwana ghangu mpalwa. nihekeleswa nesu na mweni."

4

¹Hinu Yesu alongosilwi na Mpumulo mbaka kulivagha ili ayeswi na lihyukana. ²Paawelili kawopa mulyo kwa lipindi lya machuwa ialobaini pamuhi na uhiku akolilwi na njala. ³Myesa akahika na kumlongela, "Ikiva wenga ni Mwana wa Sapanga, uyalaghili maganga hagma yaweli libumunda." ⁴Ila Yesu amyangili na kumlongela, "Iyandikwa, 'Mundu atelama ng'ogha kwa libumunda weka yaki, ila kwa kila lilando lyeni kuhuma kumlomo wa Sapanga.'" ⁵Hinu lihyukana likamyegha kummbwani uyandalwa kwaikiva gha Sapanga na kumvika mahala pakunani nesu kulighuta lya Sapanga, ⁶na kumlongela, "Ikiva wenga ni Mwana wa Sapanga, ujumbi pahi, kwaikiva iyandikwa, 'Atelaghila watumikila ghaki wa kundumba wahiki wakudaki,' na, 'watekuyinula kwa mawoku ghau, ili ukotoho kulikwala maghulu ghako kuliganga.'" ⁷Yesu akamlongela, "Kangi iyandikwa, 'Ukotoho kumuyesa Bambu Sapanga wa wenga,'" ⁸Hinu, lihyukanaakamtola na kumyegha mbandi gha kunani nesu akamlangiha unkosi wogha wa mlimawogha na unaisa wogha. ⁹Akamlongela, "Nitekupegha hindu vyogha havi paukinitundamila na kuniyupa." ¹⁰Hinu Yesu akamlongela, "Uyendi zyako uhuki panenga, Lihyukana! Kwaikiva iyandikwa, 'Ungupalwa umtundamili Bambu Sapanga ghako, na umumikili mweni weka yaki.'" ¹¹Hinu lihyukana likamleka, na uloli, watumikila wa kundumba wa Sapanga wakahika wakamtumikila. ¹²Hinu Yesu pakayoghanila yiwa Yohana kakamulwa, akahuka mbaka ku Galilaya. ¹³Ahukili ku Nazaleti akayenda na kulikala ku Kapelinaumu, yeni kuwela mmbalimbali wa bahali gha Galilaya, kumimbaka gha mimbwani gha Zabuloni na Nafutali. ¹⁴¹⁵¹⁶Hai ihumilili kutimilisa kila kilongelilwi na mlota Isaya, "Kumlima wa Zabuloni na mlima wa Nafutali, kuyendela kubahali, ng'wambo gha Yorudani, Galilaya gha wandu wammaya ng'ogha Sapanga! Wandu walikalili mlwisa waulola mhana mkulu, na wala weni kuwela walikala kumahala na kisisi kya kihu, kunani ghau mhana uwalangasila." ¹⁷Kuhumila lipindi hali Yesu akatumbula kutangasa Habali Maha na kulonga, "Mleki sambi, kwaikiva unkosi wa kundumba wapabei." ¹⁸Paawelili akityanga mmbalimbali gha bahali gha Galilaya, awawonili walongo waivili, Simoni mwenikuwela akikemwa Petelo, na Andelea mhaja ghaki, wakitegha nyafu mbahali, kwaikiva wawelili walopola wa homba. ¹⁹Yesu akawalongela, "Mhiki mnikovekeli, nitewaghola kuwela walopola wa wandu." ²⁰Ilipindi lilalila wakaleka nyafu na kumkovekela. ²¹Na Yesu paawelili akiyendelela kuhuka pala akawalola walongo waivili waghangi, Yakobo mwana wa Zebedayo, na Yohana mhaja ghaki. Wawelili kuwato pamonga na Zebedayo tati ghau akisona nyafu zyau. Akawakema, ²²na lipindi lilalila wakaleka wato na tati ghau na wakamkovekela. ²³Yesu atyangili na kuleka mbandi mayaghani kuhikila Galilaya hyogha, akivula kumaghuta gha kukonganikila Wayahudi, akitangasa Habali Maha gha unkosi, na akilamisa kila ndambu gha kulwala na mavina paghati gha wandu. ²⁴Habali zyaki zkalandala ku Silia hyogha, na wandu wakawayegha kwa mweni wala wandu wogha wawelili wakivina, wakiwela na mavina wekaweka na maumifu, wenikuwela na mahoka, na weni ulwala wa KIFafa na weni kupola vikongonu. Yesu awalamisili. ²⁵Lipinga likulunga lya wandu likamkovekela kuhuma ku Galilaya, na Dekapoli, na Yelusalemu na Uyahud na kuhuma kung'wambu gha Yoludani.

¹Yesu paalolile lipinga, akahuka na kuyenda Kulitombi. Paawelili kalikala pahi, wavulwa ghaki wakahka kwa mweni. ²Akagubutula mlomu ghaki na akawavula, akilonga, ³"Wahighilwa weni kuwela wangali kindu wa mpumulo kwaikiva unkosi wa kundumba ni waweni. ⁴Wahighilwa weni kuwela na unyengemalo, kwaikiva watetaywa moyu. ⁵Wahighilwa weni unyalinyali, kwaikiva hagma watelihi mlima. ⁶Wahighilwa weni njala na kuyumilila kwa haki, kwaikiva weni wateyukutiswa. ⁷Wahighilwa wala weni luhungu kwaikiva weni watepokela luhungu. ⁸Wahighilwa weni moyu maha kwaikiva weni watemlola Sapanga. ⁹Wahighilwa waghohesa ndulumu, kwaikiva weni watekemwa wana wa Sapanga. ¹⁰Wihighilwa wala weni kuhakilwa kwaikiva gha haki, kwaikiva unkosi wa kundumba ni wa weni. ¹¹Mhhighilwa mwenga weni kuwela wandu watewalighu na kuwahakila, au kulonga kila ndambu gha uhakata kwa mwenga kwa uhwangi kwaikiva gha nenga. ¹²Mhekeleli na kuhina, kwaikiva hupo gha mwenga ni ngulu kunani kundumba. Kwaikiva havi ndiwa wanduwawahakilile walota walamil pambila gha mwenga. ¹³Mwenga ni munyu gha mlimawogha. Ila paikawela munyu uyalamisa umunyu ghaki, itewesa ghuli kugholeka munyu chakaka kangi? Katu itewesa ng'ogha kuwela maha kwa kindu kighangi chochosi kangi, ila ni kutaghwa panje na kutimbangwa na maghulu gha wandu. ¹⁴Mwenga ni mhana wa mlimawogha. Mlima weni kuchengwa kunani gha litombi uwesa ng'ogha kufiswa. ¹⁵Hata wandu wangukosa ng'ogha limbamba na kuvika pahi gha kibeza, ila kweni mesa, na lyeni linglangasa wogha weni kuwela mghati gha kyumba. ¹⁶Uleki mhana wa mwenga ulangasi kuulongolo gha wandu kwa njila yenikuwela, wayaloli matendu gha mwenga gha maha na kumkwilika Bambu wa mwenga mweni kuwela kundumba. ¹⁷Mkotoho kuliwachila yiwa nihika kuyaghamila selia hata walota. Nihika ng'ogha kuteyaghamilaila kutimilisa. ¹⁸Kwa chakaka ninguwalongela yiwa mbaka kundumba na mlimawogha vyogha viyendi kwahela yodi imonga hata nukuta imonga gha laghililo litehumiswa kuselia maka pala kila kindu pakitewela kitimilwa kala. ¹⁹Hinu yeyosi mweni kutenyula amuli isokombi paghati gha amuli hazi na kuwavula waghangi kughola nagma atekemwa msokombi kuunkosi wa kudumba. Ila yeyosi mweni kukola na kuvula atekemwa mkulu kuunkosi wa kundumba. ²⁰Kwaikiva ninguwalongela yiwa haki gha mwenga paiwela ng'ogha ngulu kupiti gha wayandika na Mafalisayu, kwa njila yoyosi hila mteyingila ng'ogha kuunkosi wa kundumba. ²¹Myoghanila ilongilwi haku dahili yiwa, "Ukotoho kukoma" na 'yeyosi mweni kukoma kakuhatali gha kulamulwa.' ²²Ila ninguwalongela yeyosi mweni kumhyomela mlongo ghaki atewela kuhatali gha kulamulwa. Na yeyosi mweni kumlongela mlongo ghaki yiwa, 'Wenga kwamundu wa maha ng'ogha!' atewela kuhatali gha njenga kaya. N yeyosi mweni kulonga, 'Wenga kwa ndyungi! atewela kuhatali gha lyoto lya kujehanamu. ²³Hinu handa unguyegha litambiku lyaku kuluhanja lweni kuchengwa kwa maganga na kunu ungukumwiki yiwa mlongu ghako kana mghalu wowowski na wenga, ²⁴ulileki litambiku hali kuulongolo gha lihanja, na hinu uyendi. Kajumilai naye hayu mlongu ghako, na hinu uhiki kuyegha hali litambiku lyako. ²⁵Ujumilani na msitaki ghako kwa kuloposela, ukiwela pamonga naye kunjila kuyendela kuulamulo, kihyetu na hagma msitaki ghako anguwesa kukuleka kumawoku gha mlamula, na mlamula akuleki kumawoku gha watovangonde, na wenga utetaghwa mlighuta lya wawopwa. ²⁶Ukwinili ninguwalongela, katu utevikwa ng'ogha pekesu mbaka uweli uhipa sendi gha mwihu gha mapesa ghala ungupalwa kuhipa. ²⁷Myoghanila ilongwa yiwa, 'Ukotoho kughola ngongola.' ²⁸Ila nenga ninguwalongela yoyosi mweni kumlola mdala kwa luhujulu hayu kaghola kala ngongola na hayu mdala. ²⁹Na paikawela lisu lyako lya kuliyila lingukuyambusa ulikwali, ulitupuli na ulitaghi kutali na wenga. Kwaikiva ni mbaha kikongonu kimonga kuhigha ghako kiyalamiki kupiti mhigha wogha kutaghwa kulyoto. ³⁰Napaikawela liwoku lyako lya kulume lingukuyambusa ulikwali, ulidumuli na kulitaghila kutali na wenga. Kwaikiva ni mbaha kikongonu kimonga kuhigha ghako kiyalamiki kupiti mhigha wogha kutaghwa kulyoto. ³¹Iyandikwa hilahila, yeyosi mweni kumuwinga mhumbu ghaki, na ampehi lihamba lya mlekanu, ³²Ila nenga ninguwalongela, yeyosi mweni kumleka mhumbu ghaki, ila weka kwaikiva gha ngongola, angumghola kuwela mngongola. Na yeyosi mweni kumposa badili gha kupeghwa lihamba lya kulekana hayu angughola ungongola. ³³Kangi, myoghanila ilongilwi kwa wala wa dahili, 'Mkotoho kulapa kwa uhwangi, ila myeghi vilapo vya mwenga kwa Bambu.' ³⁴Ila nenga ninguwalongela, mkotoho kulapa hata mayaghani, ama kwa kundumba, kwaikiva ni ukwilikihi wa Sapanga; ³⁵wala kwa mlimawogha, kwaikiva ni mahala pakuvika kikalilo kya kukobeka lyayo ghaki, ama kwa Yelusalemu, kwaikiva ni mlima wa nkosi mkulu. ³⁶Hata ukotoho kulapa kwa mutu ghako, kwaikiva wenga uwesa ng'ogha kughola hwila imonga kuwela mbuleti au nditu. ³⁷Ila milando gha mwenga iweli, 'Hina, hina, ng'ogha, ng'ogha.' Kwaikiva yeni kupiti hagma yanguma kwa yula mhakata. ³⁸³⁹Myoghanila ilongwa yiwa, 'lisu kwa lisu, na lino kwa lino.' Ila nenga ninguwalongela, mkotoho kusindana na mundu mhakata; ila mundu pakakutova lishavu lya kuliyila umghalambulile na lighangi hilahila. ⁴⁰Na paikawela yeyosi angupala kuyenda na wenga kuulamulo na akakupoka lihabiti lyako, umlekeleli na mghololi ghako hilahila. ⁴¹Na yeyosi mweni kukulasimisa kuyenda na wenga maili imonga, uyendi na mweni maili imbili. ⁴²Kwa yeyosi mweni kukuluwa umpeghi, na ukotoho kumhyeta yeyosi mweni kupala kukukopa. ⁴³Myoghanila ilongwa, 'Umpali mundu wa pabei ghako, na umhyomeli mhakata ghako. ⁴⁴Ila nenga ninguwalongela, muwapali wahakata wa mwenga, muwayupili wala weni kuwahyomelesa, ⁴⁵ili muwesi kuwela wana wa Tati wa mwenga mweni kuwela kundumba. kwaikiva angughola lijuwa liwalangasili wandu wahakata na wandu maha, na anguwatonyela mvula wahakata na wandu maha. ⁴⁶Ikiva munguwapala wala weni kuwapala mwenga, mngupokela hupo liki? Kwani wakungula usulu wangughola ng'ogha nagma? ⁴⁷Napaikawela mnguwapambusa walongu wa mwenga weka yaki mngupokela liki kupiti waghangi? Ghuli!, wandu wa mlimawogha wangughola ng'ogha nagma? ⁴⁸Hinu mngupalwa kuwela mtimila, handa Tati wa mwenga mweni kuwela kundumba vila kawela katimila.

¹Uyangali kukotoho kughola matendu gha haki kuulongolo gha wandu ili ujilangihi, kihyetu na hali utepokela ng'ogha hupo kuhuma kwa Tati mweni kuwela kundumba. ²Hinu paupeghe ukotoho kutova lipembi na kulitutumula mweni handa wambindingu vila waighola kumaghuta gha kukonganila Wayahudi na kunjila, ili wandu wawesi kuwayinula. Chakaka ninguwalongela, weni wapokela kala hupo ghau. ³Ila wenga paupeghe, liwoku lyako lya sotu likotoho kumanya kila kingugholwa na liwoku lya kuliyila, ⁴ili hupo ghako ihumiswi kwa kifisu. Ndiwa Tati ghako mweni kuwona ghala gha mkifisu atekupatila hupo ghako. ⁵Na pawela unguyupa, ukotoho kuwela handa wambindingu, kwaikiva wangupala kugholoka na kuyupa kumalighuta gha kukonganikila Wayahudi na njila zya kumaghuta wekaweka, ili wandu wapati kuwalola. Chakaka ninguwalongela, wapokela kala hupo ghau. ⁶Ila wenga, paupupa, uyingili mkyumba. Uwopi mlyangu, na uyupi kwa Tati ghako mweni kuwela mkifisu. Ndiwa Tati ghako mweni kuwona mkifisu atekupatila hupo ghako. ⁷Na pawela ukayupa, ukotoho kuhuyila huyila milando ivile ng'ogha na fwaida handa wandu wa milima ghanghi vila waigholile, kwaikiva wanguliwachila yiwa wateyoghanilwa kwaikiva gha milando ghau mitangala wanguilongela. ⁸Kwa nagha, ukotoho kuwela handa weni, Kwaikiva Tati ghako angumanya kila ungukipala hata pambila ukali kumyupa. ⁹Hinu uyupi nagha: Tati mweni kuwela kundumba, ulikwikisi lihina lyako. ¹⁰Unkosi ghako uhiki, mapalo ghako yagholeki haku kumlimawogha handa haku kundumba. ¹¹Utupatili lelo libumunda lya twenga lya kila lelo. ¹²Utulekeseli lideni lyetu, handa tenga vila tunguwalekesela wala tunguwela na lideni nau. ¹³Na ukotoho kutuyegha kumayeso, ila utuviki kutali na yula mahakata. ¹⁴Ikiva mtewalekesela wandu mahakata ghau, Tati ghako mweni kuwela kundumba hila hila atewalekesela mwenga. ¹⁵Ila paikawela muwalekesela ng'ogha mahakata ghau, hata Tati wa mwenga atewalekesela ng'ogha mahakata gha mwenga. ¹⁶Kupiti hyogha, pawela uwopa mulyo, ukotoho kuwona wuso gha kunyengemala handa wambindingu vila waigholile, kwaikiva wanguwona wuso unyengemala ili wandu wamanyi yiwa wawopa. Chakaka ningukulongela, wapokela kala hupo ghau. ¹⁷Ila wenga, pawela uwopa, upakali mahuta mutu ghako na uwofuli wuso ghako. ¹⁸Hinu itekuwona ng'ogha kuulongolo gha wandu yiwa uwopa, ila itewoneka hela kwa Tati ghako mweni kuwela mkifisu. Na tati ghako mweni kulola mkifisu, atekupegha hupo ghako. ¹⁹Ukotoho kuivikila ngoku ghako mweni haku kumlimawogha, kweni kuwela nondu na kutu wangukuloghanya, kweni kuwela wihi wangu wangubomola na kuhija. ²⁰Badili ghaki, jivikili ngoku ghako mweni kundumba, kweni kuwela nondu na kutu viwesa ng'ogha kukuloghanya, na kweni kuwela wihi wawesa ng'ogha kubomola na kuhija. ²¹Kwaikiva ngoku ghako kula iwela, ndiwa na moyu ghako kula utewela hilahila. ²²Lisu ni limbamba lwa mhigha. kwa nagha, ikiva lisu lyako ni likomu, mhigha wogha utememeswa na mhana. ²³Ila paikawela lisu lyako ni likomu ng'ogha, mhigha ghako wogha umema lwisa tolo. Kwa nagha, ikiva mhana weni kuwela mghati mwa wenga ni lwisa nesu, ni lwisa ngulu kwa ukulu ghani! ²⁴Kwahela hata mmonga mweni kuwesa kuwatumikila mabambu waivili, kwaikiva atemhyomela mmonga na kumpala mghangi, au paikawela ng'ogha nagha atejitola kwa mmonga na kumpughanya mghangi. Muwesa ng'ogha kumtumikila Sapanga na hindu. ²⁵Kwa nagha ningukulongela yiwa ukotoho kuwela na holu kulongela kulama kwa wenga, yiwa utelyegha niki au utenywegha niki, au kulongelela mhigha ghako, utevala niki. Ghuli! Kulama ng'ogha kukulu kupiti mulyo na mhigha kupiti nguu? ²⁶Uloli wambongu weni kuwela kunani. Wangutukutula ng'ogha na hilahila wangubena ng'ogha na wangukungula ng'ogha na kuvika mngoku, ila Tati wa mwenga wa kundumba anguwapegha mulyo. Ghuli mwenga ng'ogha wa samani kupiti weni? ²⁷Na ni ghani paghati gha mwenga kwa kuighasa anguwesa kuyongesa kindu kuukomu wa ngalilu ghaki? ²⁸Na kwakanyi mnguwela na holu kulongela nguu? Mliwachili kwa maua kumatawa, vila yangukula. Yangughola ng'ogha lihengu na yanguwesa ng'ogha kuivalisa. ²⁹Nambila ninguwalongela, hata Sulemani kuukwikilahi ghaki wogha kavaliswa ng'ogha handa amonga gha hagh. ³⁰Ikiva Sapanga anguvalisa manyahi kumatawa, yakiva yangulikala lichuwa limonga na kilau ghaki yangutaghwa kulyoto, ghuli ni kwa ukulu ghani atewavalisa mwenga, mwenga weni ukwinila msokombi? ³¹Kwa nagha mkotoho kuwela na holu na kulonga, 'Ghuli tutelyegha niki?' au 'Ghuli tutenywegha niki?' au 'Ghuli tutevala nguu liki?' ³²Kwaikiva milima inguhakula mighalu hai, na Tati wa mwenga wa kundumba angumanya yiwa mngupala hagh. ³³Ila mtumbulo mahakuli unkosi ghaki na haki ghaki na hagh hyogha yatepeghe kwa wenga. ³⁴Kwa nagha, ukotoho kulola holu kwaikiva gha kilau, kwaikiva kilau itejighola yeni. Kila lichuwa lingutosa kuwela na uhakata ghaki lyeni.

¹Ukotoho kulamula, ili nawe ukotoho kulamulwa. ²Kwa ulamulo hau unguughola, na wenga utelamulwa. Na kwa kipimilo kila ungukitumila na wenga hilahila utepimilwa haki haki. ³Na kwa kyani ungulola kipandi kya libiki kyeni kuwela mlisu lya mlongo ghako, ila ungumanya ng'ogha kipandi cha mhimbati kyeni kuwela mlisu lya wenga? ⁴Unguwesa ghuli kulonga kwa mlongo ghako, ulindili nikuhumisi kipandi kyeni kuwela mlisu lyako, naikiva kipandi kya mhimbati kiwela mghati mwa lisu lyako? ⁵Mbindingu wenga; utumbuli kuhumisa mhimbati weni kuwela mlisu lyako, na ndiwa utewesa kulola maha na kukihumisa kipandi cha libiki kyeni kuwela mlisu lya mlongo ghako. ⁶Ukotoho kuwapegha ghalu kyeni kuwela kimbuteti, na ukotoho kuwataghila nguluwi lulu kuulongolo gha weni. Kihyetu na hagh watekiyalamisa na kuvitimbanga kwa maghulu, na kangi watekuhyukila wenga na kukulalula vipandi vipandi. ⁷Uluwi na wenga utepeghe. Uhakuli na wenga utepokela. Ubisi hodi, na wenga utewoposelwa. ⁸Kwa yeyosi mweni kuluwa, angupokela. Na kwa yeyosi mweni mweni kubisa hodi, atewoposelwa. ⁹Au kuvile na mundu paghati gha mwenga mweni kuwela mwana ghaki kamluwa kipandi lya libumunda atempeghe liganga? ¹⁰Au ikiva atemluwa homba, na mweni atempeghe njoka? ¹¹Kwa nagha, ikiva mwenga weni kuwela wahakata mngumanya kuwapegha wana wa mwenga hupo maha, ghuli! Ni kwa

ukulu ghani Tati mweni kuwela kundumba atewapegha vindu maha wala weni kumlowa mweni? ¹²Kwaikiva gha nagma, paupala kugholelwa kindu chochosi na wandu waghanga, na wenga hilahila utepalwa kuwagholela nagma nagma weni. kwaikiva hai ni selia na walota. ¹³Myingili kwa kupitila mlyango ukombala, kwaikiva ligeti na lipana na njila ni pana yenikulongosa kweni uyalamiso, na kuvile na wandu watangala weni kupitila njila hai. ¹⁴Mlyangu ni ukombala, njila ikombala ni njila yenikulongosa kweni ukomu na ni mayaghani weni kuwesa kuilola. ¹⁵Mlikali mihu na walota wa uhwanga, wenikuhika kunu wavala ngozi gha kondolu, ila chakaka ni ghalu mwitu wakalipa. ¹⁶Kwa matughula ghau mtewamanya. Ghuli wandu wanguwesa kubena matungula kulibiki lya mihomi, au mtini kumbeyu gha mbaluti? ¹⁷Kwaikiva gha nagma, kila libiki lya maha litelela matungula gha maha, ila libiki lihakata lingulela matungula mahakata. ¹⁸Libiki lya maha linguwesa ng'ogha kulela matungula mahakata, hata libiki lihakata liwesa ng'ogha kulela matungula maha. ¹⁹Kila libiki lyeni kulela ng'ogha matungula maha litedumulwa na kudangwa kulyoto. ²⁰Hinu kwa nagma, utewamanya kukovekelana na matungula ghau. ²¹Ng'ogha kila mundu mweni kunongela nenga, 'Bambu, Bambu,' ateyingila kuunkosi wa kundumba, ila ni yula weka mweni kughola mapalo gha Tati ghangu mweni kuwela kundumba. ²²Wandu watangala watenilongela lichuwa lila, 'Bambu, Bambu, tughola ng'ogha ulota kwa lihina lyako, tuhumisa ng'ogha mahoka kwa lihina lyako, na kwa lihina lyako tugholiile matendu matangala makulu?' ²³Ndiwa nitewalongela lipala, 'niwamanyile ng'ogha mwenga! Mhuki kwa nenga, mwenga weni kughola mahakata!' ²⁴Kwa nagma, kila mmonga mweni kuyoghanila milando ghangu na kuyitikila atelandana na mundu mweni luhala mweni kuchenga lighuta lyaki kunani gha mghomba. ²⁵Ndonya ikatonya, mafulilu yakahika, na liyegha likahika na likatova lighuta hali, ila iwesa ng'ogha kuguwa pahi, kwaikiva iwelili ichengwa kunani gha mghomba. ²⁶Ila kila mundu mweni kuyoghanila lilando lyangu na akotoho kuliyitikila, atelandaniswa na mundu msihisihi mweni kuchenga lighuta lyaki kunani gha mhangha. ²⁷Ndonya ikahika, mafuliko yakahika, na liyegha likahika na kutova lighuta hali. Na likaguwa, na uyalamiso ghaki ukatimila. ²⁸Likahika lipindi livile Yesu pakayomola kulongela milando hai, konganiko likakangaswa nesu na mavulo ghaki, ²⁹kwaikiva avulile handa mundu mweni ulongosi, na ng'ogha handa wayandika ghau.

8

¹Lipindi Yesu paahulukili pahi kuhuma kulitombi, lipinga likulunga likamkovekela. ²Uloli, mkalawa akahika na kutundama kuulongo ghaki, akalonga, "Bambu, ikiva uliyandala, unguwesa kunighola niweli maha." ³Yesu akalangiha liwoko lyaki na kumyavisa, akalonga, "Niliyandala kala. Uweli maha." Bahala akagholulwa ukalawa ghaki. ⁴Yesu akamlongela, "Uloli yiwa ukotoho kulonga kwa mundu yeyosi. Ukoli njila ghako, na ujilangihi mweni kwa mtambika na upeghi litambiko lila Musa alaghilili, kwaikiva gha uhighiliso kwa weni." ⁵Lipindi Yesu pakahika ku Kapelnaumu, Jemedali akahika kwa mweni na kumkonya ⁶akilonga, "Bambu, mtumikila ghangu kawonja ukaya kapola na mhigha ungutama nesu." ⁷Yesu akamlongela, Nitehika na kumlamisa. ⁸Jemedali akayanga na kumlongela, "Bambu, nenga ng'ogha wa samani hata uhiki na kuyingila mghati gha dali lyangu, ulongi lilando hela na mtumikila ghangu atelamiswa. ⁹Kwaikiva nenga hilahila ni mundu mweni ulongosi, na niwela na watovangondo weni kuwela pahi ghangu. Panitelonga kwa hayu "uyendi, 'na anguyenda, na kwa mghangi 'Uhiki' na mweni anguhika na kwa mtumikila ghangu, 'Ghola nagma,' na mweni angughola nagma." ¹⁰Lipindi Yesu pakayoghanila hagma, alikangasilwi nesu na kuwalongela wala wawelili wakimkovekela, "Chakaka ninguwalongela, Nipatiti ng'ogha kulola mundu mweni ukwinila handa hayu ku Izilaeli. ¹¹Ninguwalongela, watangala watehika kuhuma kumasaliki na magalibi, watelikala kumesa imonga na Ablahamu, Isaka na Yakobo kuunkosi wa kundumba. ¹²Ila wana wa unkosi watetaghwa kulwisa lya panje, kuvile kutewela na kulila na kuhyagha malino." ¹³Yesu akamlongela Jemedali, "Uyendi! handa vila ukwinila kala, na igholeki nagma kwa wenga." Na mtumikila alamsilwi kulipindi lilalila. ¹⁴Lipindi Yesu paahikili kulighuta lya Petelo, amwonile nyongo mkwahano ghaki na Petelo kawonja akiva mvina wa kulwala. ¹⁵Yesu akamyavisa liwoko lyaki, na kulwala ghaki kukamleka. hinu akayinuka akatumbula kumtumikila. ¹⁶Na pahika lumihi, wandu wakamyeghela Yesu wandu watangala weni kukolwa na mahoka. Akawawinga mahoka na wala weni kuwela wavina akawalamisa. ¹⁷Kwa nagma yakawela yatimila yala yalongelwa kala na Isaya mlota, "Hayu mweni atolili mavina gha twenga na apapili kulwala gha twenga." ¹⁸Hinu Yesu pakalilola lipinga limtindila, akawapegha milando gha kuyenda mbandi ghanghi gha Bahali gha Galilaya. ¹⁹Hinu myandika akahika kwaki na kumlongela, "Mvula, nitekukovekela poposi paunguyenda," ²⁰Yesu akamlongela, "Ghalu mwitu wavile na mbangu, na mbongu wa kunani wavile na vijaka, ila Mwana wa Adamu kahela mahala pakuwonjesa mutu ghaki." ²¹Mvulwa mghangi akamlongela, "Bambu, unilekeseli huti niyendi kumsika Tati ghangu." ²²Ila Yesu akamlongela, "Unikovekeli, na uwaleki wahovili wasiki wahovili wayau" ²³Yesu pakayingila kuwato, wavulwa ghaki wakamkovekela kuwato. ²⁴Uloli, likayinuka liyegha likulu kunani gha bahali, kikaghola hata wato igubikwi na mawimbi. Ila Yesu awelili kawonja. ²⁵Wavulwa wakahika kwa mweni na kumlongela wakilonga, "Bambu, utulokoli twenga, tunguhova." ²⁶Yesu akawalongela, "kwa kyani mngutila, mwenga weni ukwinila msokombi?" Ndia akayimuka na kukemela liyegha na bahali. Hinu kukawela na kuponga kukulu, ²⁷walumi wakakolwa na mkangaso wakalonga, "Hayu mundu ni mundu liki, yiwa hata mahoka na bahali vingumyitikila mweni?" ²⁸Lipindi Yesu paawelili kahika kumbandi ghanghi wa mlima wa Magadala, walumi waivili weni kulongoswa na mahoka wakakongana na mweni. Wawelili wakihumila kumamambi na wawelili wakighola mkologhanyu nesu, ikaghola mbaka isindikani mweni kuwela na mwanja apiyi njila hila. ²⁹Uloli, watovili lilowi na kulonga, "Tuvile na niki kya kughola kwa wenga, Mwana wa Sapanga? Uhika haku kutuhakila pambila gha lipinga kuhika?" ³⁰Hinaa lipinga likulunga lya ghuluwi liwelili likihunga, pawelili ng'ogha kutali nesu na pala wawelili, ³¹mahoka wayendelelile kumlalamikila Yesu na kulonga, "Ikiva utetulaghila kuhuka, tuyeghi kulipinga lya ghuluwi," ³²Yesu

akawalongela, "Myendi" Mahoka wakamuhuka na kuyenda kwa ghuluwi. Na uloli, lipinga lyogha likahuluka kuhuma kulitombi kuyendela kubahali na lyogha likahovila mbahali.³³ Walumi wenikuwela wakihunga ghuluwi watuwili mbilo. Na pawayendili kumbwani wakalongela kila kindu, nesu nesu kila kihumila kwa walumi wakolilwi na mahoka.³⁴ Uloli mbwani wogha ukahika kukonganika na Yesu. Pawamlolile, wamluwili ahuki kumbwani ghau.

9

¹Yesu akayingila kuwato, akahubhuka na akahika kumlima awelili angulikala.² Uloli, wakamyeghela mundu mweni kupola kawonjeswa kulihinda. pakalola ukwinila ghau, Yesu akamlongela mundu mweni kupola, "Mwana ghangu, uweli na luheku, sambu syako silekeselwa."³ Uloli, amonga gha wavula wa selia wakalongelana weni kwa weni, "Hayu mundu angulighu" ⁴Yesu akamanya mawachilo ghau na kulonga, "Kwa kyani mnguwachila mahakata kumioyu gha mwenga?" ⁵Niki kiwela kiyuyughu kulonga, 'Sambu syako silekeselwa' au kulonga, 'ugholoki na utyangi?' ⁶Ila mmanyi yiwa Mwana wa Adamu kana uwesu wa kulekesela sambu...'" hinu akalongela kwa yula mweni kupola, "Ugholoki, utoli ligodolu lyako, na uyendi ukaya ghako." ⁷Ndiwa yula mundu akagholoka na kuhuka kuyenda ukaya ghaki. ⁸Makonganilo pawawonile hagma, walikangasili na kumuyinula Sapanga, avile kawapegha uwesa hau wandu. ⁹Na Yesu paawelili akityanga kuhuma pala, amlolile mundu avile akikemwa kwa lihina Iya Matayo, avile kalikala mahala kwa wakungula usulu. Na mweni akamlongela, "Nikovekeli nenga" na mweni akagholoka na kumkovekela.¹⁰ Na yula paatamili ili alyeghi mulyo mghati mwa lighuta, wakahika wakungula usulu watangala na wandu wahakata wakakonganika kumulyo pamonga na Yesu na wavulwa ghaki. ¹¹Ndiwa Mafalisayu pawailolile nagma, wakawalongela wavulwa, "Kwa kyani mvula wa mwenga angulyegha pamonga na wakungula usulu na wandu wahakata?"¹² Yesu pakayoghanila hagma, na mweni akalonga, Wandu weni kuvina ng'ogha wangumpala ng'ogha mganga, ila wala wenikuwela wavina. ¹³Mngupalwa myendi mkaivuli ingumaanisa niki, "Ningupala luhungu na ng'ogha zabihu" Kwaikiva nihikili, ng'ogha kwa mweni haki kuleka sambu, ila kwa weni sambu. ¹⁴Ndiwa wavulwa wa Yohana wakahika kwa mweni na kulongela, "Kwa kyani twenga na Mafalisayu tunguwopa mulyo, ila wavulwa ghako wanguwopa ng'ogha mulyo?" ¹⁵Yesu akawalongela, ghuli wakovekela mhambu wa uposo wanguwesa kuwela na unyengemalo lipindi Bambu wa mhambu pakawela pamonga na weni? Ila machuwa yanguhika pavile Bambu wa mhambu atetilwa kuhuma kwa weni, na ndiwa watewopa mulyo.¹⁶ Kwahela mundu mwenikuvika kipandi kya nguu hyonu kunguu gha dahile, kidabwada kitebaluka kuhuma kunguu na mbaluko mkulu utehumila.¹⁷ Kwahela wandu wenikuvika uyimbi hyonu kukyombu kya uyimbi wa dahile, paikawela wakaghola, ngozi itebaluka, uyimbi utemwahika na ngosi iteyalamika. Badili ghaki, wanguvika uyimbi mhyonu kungozi hyonu na vyogha vitewela maha.¹⁸ Lipindi Yesu paawelili akiwalongela mighalu hai, uloli, afisa akahika akagondama kuulongolo ghaki. Na mweni akalonga, "Mhinja ghangu kahova hinaa, ila uhiki na uviki liwoku lyako kunani ghaki na mweni atelama kangi. ¹⁹Ndiwa Yesu akagholoka na kumkovekela na wavulwa ghaki hilahila. ²⁰Uloli, mdala awelili na uvina wa lighovela kwa lipindi Iya machuva ikumi na ivili, akahika pabehi na Yesu akayavisa mbandi gha luvniku Iya nguu ghaki. ²¹Kwaikiva alongili, "Paikawela niyavisa nguu ghaki, na nenga nitepokela kulama." ²²Yesu akahyuka na kumlola na kumlongela. ²³Na Yesu paahikili kulighuta Iya afisa, na mweni awawonili watova mbembi na lipinga Iya wandu liwelili likitova lilowi. ²⁴Namweni akalonga, "Mhuki haku, kwaikiva biti kahova ng'ogha, ila kawonja. Ila weni wahekili na kumpughanya." ²⁵Na wala wandu pawahumiswa panji, na mweni akayingila mkyumba na kumkola liwoku na mhinja akayimuka. ²⁶Na habali hazi zikalandala kumbwani wogha. ²⁷Ndiwa Yesu paawelili akityanga kuhuma pala, walumi waivili wangali mihu wakamkovekela. Wayendelelili kutova lilowi wakilonga, "Tunguluwa utuwoneli luhungu, Mwana wa Daudi." ²⁸Lipindi Yesu pakahika kulighuta, wala wangalimihu wakahika kwa mweni. Yesu akawalongela, "Mngukwinila yiwa ninguwesa kughola?" Na weni wakamlongela "Hina, Bambu." ²⁹Ndiwa Yesu akayavisa mihu ghau na kulonga, "Na igholeki nagma kwa mwenga handa ukwinila wa mwenga vila uwela." ³⁰Na mihu ghau ikawoposoka. Ndiwa Yesu akavika mkasu akawalongela na kulonga, Mloli mundu yeyosi akotoho kumanya habali gha mghalu hau." ³¹Ila wandu hagma waivili wakahika na kutangasa habali hazi kumahala kogha gha mbwani. ³²Ndiwa wala walumi waivili pawawelili wakiyenda zyau, Uloli, mundu mmonga angali kulonga mwenikukolwa na mahoka akayeghwa kwa Yesu. ³³Na mahoka pawamuhuka, yula mundu angalikulonga akatumbula kulonga. Lipinga likalikangasa na kulongela, "Hai iwoneka ng'ogha kuizilaeli. ³⁴Ila Mafalisayu wawelili wakilonga, "Kwa wakulu wa mahoka, anguwinga mahoka." ³⁵Yesu akayenda kumbwani wogha na vimbwani. Na mweni akayendelela kuvula kumaghuta gha kukonganikila Wayahudi, akitangasa Habali Maha gha unkosi, na kulamisa mavina gha wekaweka na ulepelelu wa njila zyogha. ³⁶Lipindi pakalola lipinga, na mweni awawoneli luhungu, kwaikiva waghasikili na kutenyuka moyu. Wawelili handa kondolu wenikuwela ng'ogha na mhungaji. ³⁷Na mweni akawalongela wavulwa ghaki, "Mabeno yatangala, ila waghola lihengu ni mayaghani. ³⁸Hinu mumluwi njenji Bambu wa mabeno, ili yiwa alahili waghola lihengu kumabeno ghaki."

10

¹Yesu akawakema wavulwa ghaki ikumi na ivili pamonga na kuwapegha uweso kunani gha mahoka wahakata, kuwakemela na kuwawinga na kulamisa mavina wekaweka ndambu zyogha zya kulwala.² Mhina gha wandumindumi ikimi na ivili na hagma. La mtumbulo Simeoni (avile hilahila angukemwa Petelo), na andelea mhaja ghaki, Yakobo mwana wa Zebedayo, na Yohana mhaja ghaki: ³Filipo, na Bartelemayo, Thomaso, na Matayo mkungula usulu, Yakobo mwana wa Alfayo, na Tadeo, ⁴Simoni mkananayo, na Yuda iskaliote, avile amhyukili.⁵ Hagma ikimi na ivili Yesu awalaghlili. Na

mweni awalongilile akilonga, "Mkotoho kuyenda kumahala wangukikala wandu wammanya ng'ogha Sapanga na mkotoho kuyingila mimbwani gha wasamalia. ⁶Badili ghaki, myendi kwa kondolu wayaghamilile wa lighuta Iya Izilaeli. ⁷Na pamyenda, mtangasi na kulonga, unkosi wa kundumba wapabehi. ⁸Mlamisi wavina, mhinduli wahovili, mghululi weni ukalawa na muwingi mahoka. Mpokela yaghi yaghi, muwapeghi yaghi yaghi. ⁹Mkotoho kutola sahabu, alimasi au saba kumihaku gha mwenga. ¹⁰Mkotoho kutola mhaku kumwanja gha mwenga, au nguu zya nyongesa, vilatu au hyatu, kwaikiva mghola lihengu angupalwa apeghehi mulyo. ¹¹Mmbwani wowosi au kimbwani mteyingila, muhakuli yula mweni kuwesa kuwatanga na mlikali pala mpaka pamtehuka. ¹²Pamyangila kulighuta mjambusi, ¹³ikiva lighuta linguwonesha mkonganiko, upongu wa mwenga uhighali pala, ila paikawela lighuta liwonesha ng'ogha mkongano kwa mwenga, upongu wa mwenga uhuki na mwenga maweni. ¹⁴Na kwa wala wenikuwapokela ng'ogha mwenga na kuyoghanila milando gha mwenga, lipindi pamuhuka kulighuta au mmbwani hau, mjiipiyati malihu gha lwayu kumahala pala. ¹⁵Chakaka ninguwalongela, itewela gha kufumilila mimbwani gha Sodoma na Gomola lichuwa Iya kulamuwa kupiti mlima hau. ¹⁶Uloli ninguwalongela handa kondolu paghati gha ghalu wa kumanyaghi, kwa naha iweni na umanyi handa njokana wanyalinyali handa ngunda. ¹⁷Muweli mihi na wandu, watewayegha kunjenga kaya, na watewatova kumighuta gha kukonganikila Wayahudi, ¹⁸Na mteyeghwa kuulongolo gha wakulu na wankosi kwaikiva gha nenga, handa uhighilisu kwa weni na kwa milimahyogha. ¹⁹Lipindi pawatewasitaki, mkotoho kuwela na holu yiwa niki au mtewayanga, kwaikiva kindu kya kulongela mtepeghwa kwa lipindi hali. ²⁰Kwaikiva ng'ogha mwenga mteelongela, ila mpumulo wa tati wa mwenga ndiwa atelongela. ²¹Mlango atemyimukila mlango ghaki kumkoma, na tati kwa mwana ghaki, Wana wateyimuka kwa walela ghau, na kuwayambusila kihu. ²²Na mwenga mtehyomelwa na kila mundu kwaikiva gha lihina lyangu. Ila yeyosi atefumilila mpaka kumwihu mundu hayu atelokolwa. ²³Lipindi wanguwahakila kummbwani hau, mtuilili kummbwani wa kuulongolo, kwa chakaka ninguwalongela, mteyenda ng'ogha kumimbwani hyogha gha Izilaili pambila gha Mwana wa Adamu kuhika. ²⁴Mvulwa ng'ogha mkulu kupiti mvula ghaki, hilahila muhusutu mwenikuwela kunani gha bambu ghaki. ²⁵Ingukwila kwa mvulwa aweli handa mvula ghaki, na mtumikila handa bambu ghaki. paikawela wamkema Bambu wa lighuta Belizabuli, ni kwa ukulu ghani kupiti watewapughanya wa lighuta Iyaki! ²⁶Hinu mkotoho kuwatila weni, kwaikiva kwahela mghalu uvile utegubutulwa ng'ogha, na kwahela lijihighili livile litemanyikana ng'ogha. ²⁷Kila ninguwalongela mlwisa, mkilongeli kumhana, na kila mkiyoghanila kwa upyeku kumapulukilo gha mwenga, mkitangasi mkiwela kunani gha lighuta. ²⁸Mkotoho kuwatila wala wavile wangukoma mhigha ila wawela ng'ogha na uweso wa kukoma mpumulo. Badili ghaki, mumtili yula mweni kuwesa kuyalamisa mhigha na mpumulo kula kumamambi. ²⁹Ghuli kasuku waivili wanguwuswa ng'ogha kwa sendi mayaghani? Hata naha kwahela mweni kuwesa kuguwa pahi pambila gha Tati wa mwenga kumanya. ³⁰Ila hata isabu gha hwila zya mwenga zivalwangwa. ³¹Mkotoho kuwela na holu, kwaikiva mngupala nesu kupiti kasuku watangala. ³²Hinu kwa naha kila yula atenijumila kuulongolo gha wandu, na nenga hilahila nitemjumila kuulongolo gha Tati ghangu mwenikuwela kundumba. ³³Ila hayu atenikanila kuulongolo gha wandu na nenga hilahila nitemkanila kuulongolo gha Tati ghangu mwenikuwela kundumba. ³⁴Mkotoho kuliwachila yiwa nihika kuyegha upongu kumlimawogha. nihika ng'ogha kuyegha upongu, ila lipanga. ³⁵Kwaikiva nihikili kumvika mundu angingamani na tati ghaki, na biti kwa nyongu ghaki, na mkwahanu kwa nyongu mkwahano ghaki. ³⁶Mhakata wa mundu atewela wa kukaya ghaki. ³⁷Hayu mweni kumpala tati au nyongu nesu kupiti nenga hayu wa maha ng'ogha kwa nenga. Na hayu mweni kumpala mhongolo au biti kupiti nenga hayu kamaha ng'ogha kwa nenga. ³⁸Yula avile atepapa ng'ogha lipingika na kunikovekela nenga kamaha ng'ogha. ³⁹Hayu atehakula kulama atekuyalamisa. Ila hayu ateyalamisa ukomu ghaki kwaikiva gha nenga atepokela. ⁴⁰Yula atewakema ukaya atewela kangema nenga ukaya ghaki, na yula mweni kungema nenga atewela kamkema yula mweni kunilaghila nenga. ⁴¹Na yula mweni kumkema mlota kwaikivani mlota atepokela hupom gha ulota. Na yula atemkema mweni haki kwaikiva ni mundu wa haki atepokela hupo gha mundu wa haki. ⁴²Yeyosi atempegha mmonga wa wanung'una hagha, hata kikombi kya masi gha kunywegha ghapongili, kwaikiva mweni ni mvulwa, chakaka ninguwalongela, hayu kawesa ng'ogha kusindwa kupokela hupo ghaki

11

¹Ikiva badili gha Yesu kumalila kuwalongela wavulwa ghaki ikumi na ivili ahukili pala kuyenda kuvula na kutangasa kumimbwani ghau, ²na Yohana akiva mgelesa pakayoghanila akiwela kunani gha matendu gha Kilisito, ayeghili ujumbi kupitila waviwa ghaki, ³na wakamkonya, "Wenga ni yula tumlindilile, au kuvile nga mghangi tuvile tungupalwa kumlindila?" ⁴Yesu akayanga na kulonga kwa weni, "Myendi mkamlongeli Yohana yala mnguyalola na yala mnguyayoghanila. ⁵Wandu wangali kulola wangukikala, walemafu wa maghulu wanguyanga, weni ukalawa wangughululika, wandu weni kuyoghanila ng'ogha wanguyoghanila kangi wandu wahovili wanguhindulwa kupokela ukomu, na wandu weni kulepelelwa wanguatangasilwa Habali Maha. ⁶Na kahighilwa yula kawela ng'ogha na holu kunani gha uwela ghangu. ⁷Lipindi wandu hagha pawahukili, Yesu atumbulili kulonga na lipinga kumlongelela Yohana, "Ni kyani myendili kulola kuluvagha- mdengi ukihukumulwa na liyegha? ⁸Ila niki myendili kulola- mundu avalili nguu maha? Chakaka, wala wenikuvala nguu maheli wangukikala kumighuta gha wankosi. ⁹Ila mhukili kulola niki- Mlota? Ndiwa, ninguwalongela, na kupiti Mlota. ¹⁰Hayu ndilwa yula ayandikilwi, 'Uloli, ningumlaghila mjumbi ghangu kuulongolo gha wuso ghako, avile ateyandala njila ghako kuulongolo ghako. ¹¹Nenga ninguwalongela chakaka, paghati gha wenikuwelekwa na wadala kwahela mwenikuwela mkulu kuoit Yohana Mbatisa. Ila mwenikuwela mngung'una kunkosi wa kundumba ni mkulu kupiti mweni. ¹²Kuhuma machuva gha Yohana Mbatisa mbaka hinaa, unkosi wa kundumba ni

wa makakala, na wandu weni makakala, wanguutola kwa makakala.¹³ Kwaikiva walota na selia, wawelili wakihumisa ulota mbaka kwa Yohana.¹⁴ Na handa muliyandala kujumila, hayu ni Eliya, yula ahika.¹⁵ Mwenikuwela na mapulukilo gha kuyoghanilila na ayughanili.¹⁶ Nikilandanisi na kyani kiweleka haki? Ni mlandanu wa wana wenikuhina mahala gha kusoku, wenikulikala na kukonyana,¹⁷ na kulongela, 'Tuwa tovili lindenda na mhana ng'ogha. Tulumbilili, na mhina ng'ogha.¹⁸ Kwaikiva Yohana ahikili akileka kulyegha libumunda au kunywegha uyimbi, na wakawela wangulonga, 'Kana lihoka.'¹⁹ Mwana wa Adamu ahikili akilyegha na kuywegha na kulonga. 'Uloli, ni mundu mweni kulyegha na walowela, ghanja wa wakungula usulu na weni sambi!' Ila luhala lunguhiliswa kwa matendu ghaki.²⁰ Yesu atumbulili kukemela mimbwani ivile amonga gha matendu ghaki gha kukangasa yagholekili, kwaikiva wawelili waweka ng'ogha sambi,²¹ Chondi wenga, Kolazini, Chondi Betisaida! Handa mighalu mikulunga ingaligholeka ku Tilo na Sidoni yala yagholekili haku, wangiwiwela waleka kala sambi hahile kwa kuvala magunila na kujipakala malifu.²² Ila itewela ufumilifu kwa Tilo na Sidoni lichuwa lya ulamulo kupiti kwa wenga.²³ Wenga, Kapelinaumu, unguliwachila uteyinulwa mbaka kundumba? Ng'ogha utehuluswa mbaka pahi kumambi. Handa kwa Sodoma kungaligholeka matendu makulu, handa yaigholilwe kwa wenga, ingaliwela mbaka lelo.²⁴ Ila ningulongela kwa wenga yiwa itewela yuyughu kwa mlima wa Sodoma kugholoka lichuwa lya ulamulo kupiti wenga.²⁵ Kulipindi hali Yesu ailongile, "Ningukuyinula wenga, Tati, Bambu wa kundumba na mlima, kwaikiva uwafisili mighalu hai weni luhala na umanyi, na kuyagubutula kwa wenikuwela ng'ogha na malangu, handa wana wanung'una.²⁶ Tati kwaikiva ikupalile nagma kumihu ghako.²⁷ Mighalu hyogha ipeghilwi kwa nenga kuhuma kwa Tati. Na kwahela mweni kummanya Mwana ila Tati weka yaki, na kwahela mwenikummanya Tati ila Mwana weka yaki, na yeyosi avile Mwana kana luhujulu lwa kumugubutulila.²⁸ Muhiki kwa nenga, mwenga wogha wenikughasika na wenikuhinyikilwa na mihighu mitopa, na nenga nitewapumulisa.²⁹ Mjiviki nila ghangu na mjivuli kuhuma kwa nenga, kwaikiva nenga ni mnyenyekelela na mnyalinyali wa moyu na na mtepokela mbumulilo gha nafusi zya mwenga.³⁰ Kwaikiva nila ghangu ni pyeku na mhighu ghangu ni myuyughu.

12

¹Lipindi hali Yesu ayendili lichuwa lya sabato kupitila kumitawa. Wavulwa ghaki wawelili na njala na wakatumbula kutenyula mihoji na kulyegha.² Ila Mafalisayu pawalolile hagma, wakamlongela Yesu, "Uloli wavulwa ghako wangutenyula selia wangughola yapalilwi ng'ogha lichuwa lya Sabato."³ Ila Yesu akawalongela, "Msoma ng'ogha vila Daudi aigholile, lipindi paawelili na njala, pamonga na wandu awelili nau?"⁴ Vila kayingila mghati mwa lighuta lya Sapanga na kulyegha mibumunda gha mawoneso, ivile angupalwa ng'ogha kulyegha na wala kawela nau, ila ilekeselwa kwa watambika?⁵ Mwambila kisoma kuselia, yiwa kulichuwa lya Sabato Watambika mghati gha lighuta lya Sapanga wanguitaya ndaka Sabato, ila wanguwela ng'ogha na uhakata?⁶ Ila ningulongela kwa mwenga yiwa mwenikuwela mkulu kupiti lighuta lya Sapanga kabaha.⁷ Handa mngalimanya hai ingumaanisa niki; ningupala luhungu na ng'ogha sabihu; mngaliwalamula ng'ogha wenikuwela ng'ogha na mahakata,⁸ Kwaikiva Mwana wa Adamu ndiwa Bambu wa Sabato."⁹ Hinu Yesu akahuka pala akayenda kulighuta lya kukonganikila Wayahudi lya weni.¹⁰ Uloli kuwelili na mundu mwenikupola liwoku. Mafalisayu wakamkonya Yesu, wakilonga. "Ghuli, nimaha kulamisa lichuwa lya Sabato?" Ili yiwa wawesi kumsitaki kwa kughola sambi.¹¹ Yesu akawalongela, "Ghani paghati gha mwenga, avile pakawela na kondolu mmonga, na hayu kondolu akawela kadubukila mghati gha lihumba lichuwa lya Sabato, atemkola ng'ogha na kumuhumisa panje kwa makakala?"¹² Ghuli, ni niki kyanu kuwela maha, nesu kwaikiva ng'ogha kupiti kondolu! Kwa nagma ni maha kughola gha maha lichuwa lya Sabato."¹³ Hinu Yesu akamlongela yula mundu, "Ulangihi liwoku lyako" Akalinyoloshu, na ukawela mkomu, handa hula mghangi.¹⁴ Ila Mafalisayu wakahuma panji na kuchenga njila gha kumyalamisa wayendili panje kuchenga kihyetu kyaki. Wawelili wakihakula njila gha kumkoma.¹⁵ Yesu pakamanya hali ahukili pala. Wandu watangala wakamkovekela, na akawalamisa wogha.¹⁶ Awalaghilili wakotoho kumghola amanyiki kwa waghangi,¹⁷ Yiwa itimili hila chakaka, iwelili ikilongwa na mlota Isaya, akilonga,¹⁸ 18 Uloli, mtumikila ghangu nimuhaghulile, mpalwa ghangu, kuhayu nafusi ghangu ihekeleswa. Nitevika mpumulo ghangu kunani ghaki, na atetangasa ulamulo kwa milima.¹⁹ Ateghasika ng'ogha wala kulila kwa makakala; wala yeyosi kuyoghanila lilowi lyaki mnjila.²⁰ Atelitenyula ng'ogha liteti lichubulwa; atejimisa ng'ogha undambi wowosi weni kuhumisa lihu, mbaka paateyegha ulamulo ikasinda.²¹ Na milima watewela na makakala kupitila lihina lyaki.²² Mundu mtenu angalimihu na angali kulonga, mweni kukolwa na mahoka ayeghilwi kuulongo gha Yesu. Akamlamisa, pamonga na kuwonisa yiwa mundu angalikulonga alongile na kulola.²³ Lipinga lyogha lilikangasili na kulonga, "Anguwesa mundu hayu kuwela Mwana wa Daudi?"²⁴ Ila lipindi Mafalisayu pawayoghanila mkangaso hau, wakalonga, "Hayu mundu anguhumisa ng'ogha mahoka kwa makakala ghaki mweni ila kwa makakala gha Belizebuli, mkulu wa mahoka."²⁵ Ila Yesu amanyile mawachilo ghau na kuwalongela, "Kila unkosi weni kulekanika weni unguyalamika, na kila mmbwani au lighuta lyeni kulekanika lyeni litegholoka ng'ogha."²⁶ Paikawela Lihyakana, litemuhumisa lihyakana, hinu angulingingama kunafusi ghaki mweni.²⁷ Ni kwa ukulu ghani unkosi ghaki utegoloka? Na handa ninguhumisa mahoka kwa makakala gha Belizebuli, watumikila wa mwenga watehumisa kwa njila ghani? Kwaikiva gha hali watewela walamula wa mwenga.²⁸ Na paikawela ninguhumisa mahoka kwa makakala gha Mpumulo wa Sapanga, hinu unkosi wa Sapanga uhika kwa mwenga.²⁹ Na mundu ateyingila ghuli kulighuta lya mweni makakala na kuhija, bila kumuwopa mweni makakala huti? Ndiwa atumbuli kuhija hindu kuhuma mghati gha lighuta.³⁰ Yeyosi mwenikuwela ng'ogha na nenga kakihyetu na nenga, na yula mweni kukungula ng'ogha pamonga na nenga hayu angulandala.³¹ Kwa nagma ningulonga kwa mwenga, yiwa kila sambi na malighu wandu watelekeselwa, ila kumlighu Mpumulo wa Sapanga watelekeselwa ng'ogha.³² Na yeyosi mweni

kulonga lilando kihyetu kya Mwana wa Adamu, hali atelekeselwa. Ila yeyosi mweni kulonga kihyetu na Mpumulo wa Sapanga, hayu atelekeselwa ng'ogha, kumlimawogha hau, na hata hula utehika.³³ Au agholi libiki kuwela maheli na litungula lyaki maheli, au uylamisi libiki lya litungula lyaki, kwaikiva libiki lingumanyika kwa litungula lyaki.³⁴ Mwenga kiwelekwa kya njoka, mwenga ni wahakata, mnguwa ghuhi kulonga milando maha? Kwaikiva mlomo ungulonga kuhuma kungoku gha yala yawela mmoyu.³⁵ Mundu maha kungoku maha gha moyu ghaki yanguhuma gha maha, na mundu mhakata kuhuma kungoku ihakata gha moyu ghaki, inguhumisa kihakata.³⁶ Ninguwalongela yiwa kulichuwa lya ulamulo wandu watehumisa mavalangu gha kila lilando liwela ng'ogha lya maha wakalilongela.³⁷ Kwaikiva kwa milando ghako utevalangililwa haki na kwa milando ghako utelamulwa.³⁸ Hinu amonga gha wayandika na Mafalisayu wakamyanga Yesu wakilonga, "Mvula, tungalipala kulola vilangihi kuhuma kwa wenga."³⁹ Ila Yesu awayangili na kulonga, "Kiwelekwa kihakata na kya ngongola kinguhakula kilangihi. Ila kwahela kilangihi itehumiswa kwa weni ila kila kilangihi kya Yona mlota.⁴⁰ Handa vila mlota Yona vila kawela mghati gha mtima wa homba mkulunga kwa machuwa maitatu pamuhi na uhiku, havi ndiwa Mwana wa Adamu atewela mghati mwa moyu wa mlima kwa machuwa maitatu pamuhi na uhiku.⁴¹ Wandu wa Ninawi wategholoka kuulongolo gha ulamulo pamonga na kiwelekwa kya wandu hagma na watekilamula. Kwaikiva walekili sambu kwa kutangasa kwa Yona, na uloli, mundu mtenu mkulu kupiti Yona kabaha.⁴² Malikiya wa kusini ateyinuka kweni ulamulo pamonga na wandu wa kiwelekwa haki na kukilamula. Ahikili kuhuma kumwihu gha mlimawogha kuhika kuyoghanila luhala lwa Selemani, na uloli, mundu mtenu mkulu kupiti Selemani kabaha.⁴³ Lipindi lihoka lihakata palimuhuka mundu, linguyenda mahala pawela ng'ogha na masi akihakula kupumulila, ila kapalola ng'ogha.⁴⁴ Hinu angulonga, 'Nitehuya kulighuta lyangu nihukili.' Paahuya angulilola lila lighuta liwofulwa na liyandalwa maha.⁴⁵ Hinu anguhuya na kuwayegha waghanga mpumulo wahakata isaba weni kuwela wahakata kupiti mweni, wanguhika kulikala wogha pala. Na ndyangilu ghaki gha kumwihu inguwela ihakata kupiti hila gha mtumbulo. Hinu ndiwa itewela kwa kiwelekwa haki kihakata.⁴⁶ Lipindi Yesu paawelili akilongela na lipinga uloli, nyongo ghaki na walongo ghaki waghokili panji, wakihakula kulongela na mweni.⁴⁷ Mundu mmonga akamlongela, "Uloli nyongo ghako na walongo ghako waghokila panji, wanguhakulakulongela na wenga."⁴⁸ Ila Yesu ayanigili na kumlongela yula ampwghili habali, "Nyongo ghangu ni ghani? Na walongo ghangu ni akina ghani?"⁴⁹ Na mweni akalangiha liwoko lyaki kwa wavulwa na kulongela, "Uloli, hagma ni nyongo na walongo ghangu!"⁵⁰ Kwaikiva yeyosi mweni kughola mapalo gha Tati ghangu mwenikuwela kundumba, mundu hayu ndiwa mlangu ghangu, mhacha ghangu na nyongo ghangu."

13

¹Kulichuwa hali Yesu ahukili ukaya na kulikala mmbali gha bahali.² Lipinga likulunga likakonganika kwa kumtindila, akayingila mghati gha wato na kulikala mghati ghaki. Lipinga lyogha likagholoka mmbali gha bahali.³ Hinu Yesu akalonga milando itangala kwa mlandano, akilonga, Uloli, mkulila ayendili kukulila.⁴ Paawelili akikulila amonga gha mbeyu ziguwili mmbali gha njila na mbongu wakahika na kuzilyegha.⁵ Mbeyu ghanga ziguwili kunani gha mghomba, kuvile zipatili ng'ogha lutupi lya kukwila. Bwitu zikamela kwaikiva lutupi luweli ng'ogha litangala.⁶ Ila lijuwa palihomoka zihomilwi kwaikiva ziwelili ng'ogha na mkegha, na ziyumili.⁷ Mbeyu zighanga ziguwili paghati gha mibiki yeni mihomi. Mibiki yeni mihomi ikayenda kunani ikatindila.⁸ Mbeyu zighanga ziguwili pahi kulutupi maha na kumela mbeyu, zighanu mianja imia imonga kupiti, zighanga isitini na zighanga iselasini.⁹ Mwenikuwela na mapulukilo na ayughanili.¹⁰ Wavulwa wahikili na kumlongela Yesu, "Kwa kyani ungulongela na makongano kwa milandano?"¹¹ Yesu akawayanga na kuwalongela, "Mwenga mpendelelwa kumanya kifisu kya unkosi wa kundumba, ila weni wapeghilwi ng'ogha."¹² Ila yeyosi mwenikuwela nachu, kwa hayu ateyongeswa kupiti, na atepokela hupo ngulu. Ila yula mweni kuwela ng'ogha nachu atepokwa.¹³ Hinu ningulongela na weni kwa milandano kwaikiva pamonga na yiwa wangulola, wakotoho kulola chakaka. Na pamonga na yiwa wanguyoghanila wakotoho kuyoghanila ili wakotoho kumanya.¹⁴ Ulota wa Isaya utimila kwa weni, hula wenikulonga, "Pamyoghanila myoghanili, ila kwa njila yeyosi mtemanya ng'ogha; lipindi pamlola muwesi kulola, ila kwa njila yeyosi hila mkotoho kumanya."¹⁵ Na mioyu gha wandu hagma iwela lwisa, ni yuyughu ng'ogha kuyoghanila, na wagubika mihu ghau, ili wakotoho kulola kwa mihu ghau, au kuyoghanila kwa mapulukilo ghau, au kumanya kwa mioyu ghau, wakawesa kunihyukila kanga, na ningaliwalamisa,¹⁶ Ila mihu gha mwenga ihighilwa, kwaikiva yangulola, na mapulukilo gha mwenga kwaikiva yanguyughanila.¹⁷ Chakaka ninguwalongela walota watangala na wandu wenihaki wawelili na luhujulu lwa kuyalola mighalu hila mnguilola, na wawesili ng'ogha kuilola. Wpalile kuyughanila mighalu hila mnguiyoghanila, waiyoghanila ng'ogha.¹⁸ Hinaa myughanili mlandanu wa mkulila.¹⁹ Lipindi lolosi paanguyughanila lilando lya nkosi na akotoho limanya, ndiwa mhakata anguhika na kulitola lila likulilwi mghati gha moyu ghaki. Hai ni mbeyu hila ikulilwi mmbali gha njila.²⁰ Yula mweni kupalwa kumighomba ni yula mweni kuyoghanila lilando na kulipokela njenji kwa luheku.²¹ Kambila kahela mkegha mghati ghaki, ila anguvumilila kwa lipindi lihupi. Lipindi lung'ai au mahakilo payahumila kwaikiva gha lilando angulikwala mbwitu.²² Mweni kukulilwa paghati gha ibiki gha mihomi, hayu ni yula mwenikulioghanila lilando ila maghasu gha mlima wogha na uhwangi wa unaisa vingulitindila lila lilando likoto kulela matungula.²³ Mwenikukulilwa kulutupi maha, hayu ni yula mweni kuyughanila lilando na kulimanya. Hayu ni yula mweni kulela monga kupiti mianja imia, ghanga isitini, ngangi iselasini.²⁴ Yesu awapeghili mlandano mghangi. Akilonga, "Unkosi wa kundumba ungulandaniswa na mundu mweni kukulila mbeyu maha kulitawa lyaki. Ila²⁵ wandu pawasinzila, mhakata ghaki akahika hilahila akakulila magugu paghati gha nganu na hinu akayenda zyaki.²⁶ Kuulongolo nganu paimela na kuhumisa masau ghaki, ndiwa magugu yakahumila hilahila.²⁷ Na watumikila wa mweni litawa wakahika wakamlongela, 'Bambu, ukulilili ng'ogha mbeyu maha kulitawa lyako? hinaa iwela ghuli liwoneka na magugu?

²⁸Akawalongela, Mhakata kaghola hali.' Watumikila wakamlongela, "Kwa nagha ungupala tuyendi tukayaputuli?"²⁹Mweni litawa akilongela, 'Ng'ogha, lipindi mnguputula magugu mteputula pamonga na nganu. ³⁰Myaleki yakuli pamonga mbaka lipindi lya mabeno. Lipindi lya mabeno nitelongela kwa wenikubena, 'Mtumbulo muyatupuli magugu na muyawopi malundila malundila na kunyanya, ila mkunguli nganu kungoku ghangu.'"³¹Hinu Yesu akawapegha mlandanu mghangi. Akalonga, "Unkosi wa kundumba ungulandana na mbeyu gha haladali ivile mundu aitolili na kuikulila kulitawa lyaki. ³²Mbeyu hai kwa uchakaka ni nzokombi kupiti mbeyu zighangi zyogha. Ila paimela inguwela ngulu kupiti mimela hyogha gha kulitawa, inguwela libiki, inguwesesa mbongu wa kunani kuhika na kuchenga vijaka kumaputula ghaki." "³³Akawalongela mlandanu mghangi kangi. "Unkosi wa kundumba ni handa simika hila itolwa na mdala na kuhanganya kwa vipimu viitatu kwa ukowa mbaka vitutumuki. ³⁴Hagha hyogha Yesu ayalongile kukonganilo kwa milandano. Na kaleka ng'ogha milandanu kukulongeleta chochosi kwa weni. ³⁵Hai iwelili yiwa kila kilongelwa kala kupitila kwa mlota kiwesi kutimila, pala pailongile, "Nitefumbula mlomu ghangu kumilandanu. Nitelongela mighalu hila iwelili ifiswa kuhuma mighomba gha mlimawogha." "³⁶Hinu Yesu awalekili makongano na kuyenda ukaya. Wavulwa ghaki wamyendelili na kulongela, "Tughalambulili mlandanu wa magugu gha mlitawa." "³⁷Yesu akawalongela na kulonga, "Mweni kukulila mbeyu maha ni Mwana wa Adamu. ³⁸Litawa ni mlimawogha; na mbeyu maha, hagha ni wana wa unkosi. Magugu ni wana wa yula mhakata, na mhakata mweni kuzikulila ni Lihyukana. ³⁹Na mabeno ni mwihu wa mlimawogha, na wenikubena ni watumikila wa kundumba wa Sapanga. ⁴⁰Handa vila magugu yangukungulwa na kunyanywa lyoto, havi ndiwa itewela mwihu wa mlimawogha. ⁴¹Mwana wa Adamu ateyegha mtumikila ghaki, na kukungula kuhuma kunkosi ghaki mighalu hila iyambusilile sambi na wala wenikughola mahakata. ⁴²Watewatagha wogha kulitanulu lya lyoto, kuvile kutewela na kililo na kuhyagha malino. ⁴³Ndiwa wandu weni haki wateng'anyima handa lijuwa kuunkosi wa Tati ghau. Hayu mwenikuwela na mapulukilo gha kuyughanlila na ayughanili. ⁴⁴Unkosi wa kundumba ni handa ngoku yeni kufiswa kulitawa. Mundu akailola na kuifisa. Kuluheku lwaki akayenda kuwusa vyosi kawela navyu, na kuhemela litawa. ⁴⁵Kangi, unkosi wa kundumba ungulandana na mundu menikughola biasala mweni kuhakula lulu yeni samani. ⁴⁶Lipindi paailolile hila yeni samani, ayendili akawusa kila kindu kawela nachu na akaihemela. ⁴⁷Unkosi wa kundumba ni handa nyafu yenikuwela mghati gha bahali, na yiwa ingukungula viumbi vya wekaweka. ⁴⁸Paimema walopola wakakwegha kuufuku. Hinu wakalikala pahi wakakungula vindu maha mghati gha vyombu, ila viwela ng'ogha na samani vidangilwi kutali. ⁴⁹Itewela nagha kumwihu gha mlimawogha. Watumikila wa kundumba wa Sapanga watehika na kuwabaghula wandu wahakata kuhuma paghati gha weni haki. ⁵⁰Na kuwatagha mghati gha litanulu lya lyoto, kuvile kutewela na malumbililo na kuhyagha malino. ⁵¹Mmanga mighalu hyogha hai? Wavulwa wakamyanga, "Ndiwa." "⁵²Hinu Yesu akawalongela, "Kila myandika avile kawela mvulwa wa unkosi angulandana na mweni lighuta mwenikutola kulighuta lyaki vindu vihyonu na vihakala." "⁵³Ikawela Yesu pakayomola milandanu hyogha hai, akahuka kumahala pala. ⁵⁴Hinu Yesu akahika kummbwani ghaki na akawavula wandu kumaghuta gha kukonganikila Wayahudi. Kumwihu ghaki ni yiwa walikangasili na kulongela, "Ni kugha mundu hayu paapatile luhala hai na makangaso hagha? ⁵⁵Mundu hayu ng'ogha mwana wa selemala? Maliamu ng'ogha nyongo ghaki? Na walongu ghaki ng'ogha Yakobo, Yusufu, Simoni na Yuda? ⁵⁶Na wahacha ghaki tuwela nau baha? Hinu mundu hayu kapokela kugha mighalu hai hyogha?" "⁵⁷Awahyomesili. Ila Yesu awalongelili, "Mlota kalepelela ng'ogha kuwela na utundamilu ila ukaya weka. ⁵⁸Na kawesa ng'ogha kughola makangaso matangala kwaikiva wawelili ng'ogha na ukwinila nayu.

14

¹Kwa lipindi hali, Helodi ayoghanilile Habali kulongeleta Yesu. ²Akawalongela watumikila ghaki, "Hayu ni Yohana Mbatisa kahinduka kuhuma ku kihu. Kwa nagha makakala hagha yawela kunani ghaki." "³Kwaikiva Helode awelili kamkamula Yohana akamuwopa na kumtagha mgelesa kwaikiva gha Helodia, mhumbu wa Filipu mhaja ghaki. ⁴Kwaikiva Yohana amlongelili, Ng'ogha maha kumtola mweni kuwela mhumbu ghaki." "⁵Helode angalimkoma ila awatilili wandu kwaikiva wamlolile Yohana kuwela mlota. ⁶Ila lipindi lya kuwelekwa Helode paihikili biti wa Helode ahinili paghati gha wandu na kumhekelesa Helode. ⁷Kukuyanga kila alaghilili kwa kilapo yiwa atempegha chochosi ateluwa. ⁸Badili gha kusauliwa na nyongo ghaki, alongile, "Nipeghi nenga baha kukombi mutu wa Yohana Mbatisa." "⁹Nkosi awelili na unyengemalu kwa kuluwa kwa biti, ila kwaikiva gha kilapo kyaki, kwaikiva gha wogha weni kuwela kumulyo pamonga na mweni alamulili yiwa ingupalwa igholeki. ¹⁰Akalaghila Yohana ayeghwi kuhuma mgelesa, ¹¹ili adumulwi mutu ghaki na ukayeghwa kunani gha lisinila na akapeghwa biti na akakiyegha kwa nyongu ghaki. ¹²Hinu wavulwa ghaki wakahika kuutola hula mhigha na kuusika, badili gha hali wakayenda kumlongela Yesu. ¹³Na mweni Yesu pakayoghanila hagha, akijilekanisa kumahala pala akakwela mghati gha wato akayenda kumahala kwa weka. Lipindi mkongano pawamanyile kula kawela, wakamkovekela kwa maghulu kuhuma mmbwani. ¹⁴Hinu Yesu akahika kuulongo ghau akalola lipinga likulunga. Akawawonela luhungu na kulamisa mavina ghau. ¹⁵Lumihi paihika, wavulwa wakahika kwa mweni na kulongela, "Haku ni mahala paluvagha, na lichuva liyenda kala. Wahuyisi makongano ili wayendi kuvimbwani wakahemeli mulyo kwaikiva gha weni. ¹⁶Ila Yesu akawalongela, "Wavile ng'ogha na lukani lwa kuyenda zyau. Muwapehi mwenga mulyo" "¹⁷Wakamlongela, "Baha tuvile na mibumunda miitano na homba waivili weka," "¹⁸Yesu akalonga "Muiyeghi kwa nenga." "¹⁹Hinu Yesu akalaghila makongano kulikala pahi gha manyahi. Akatola mibumunda miitano na homba waivili. Akalola kunani kundumba, akahighila na kumetula mibumunda na kuwapegha wavulwa. Wavulwa wakawapegha makongano. ²⁰Wakalyegha wogha na kuyukwite. Hinu wakavikungula vipandi vyogha vya mulyo na kumemesa vibeba

ikumi na ivili. ²¹Wala walyeghili wawachililwi kuwela utangala wa walumi ielufu mhano wakileka kuvalanga wadala na wana. ²²Bwitu akawalaghila wavulwa wayingili mghati gha wato, lipindi hali mweni akawataula makongano wayendi zyau. ²³Badili gha kuwataula makongano kuyenda zyau, akakwela kunani kulitombi kuluwa weka yaki. Lipindi paiwela lumihi awelili haku weka yaki. ²⁴Ila hinaa watu paiwela paghati gha bahali ikiyumbila kwaikiva gha mawimbi, kwaikiva liyegha liwelili litopehu. ²⁵Kuuhiku gha zamu gha inne Yesu awahikilili pabehi, akityanga kunani gha masi. ²⁶Lipindi wavulwa ghaki pawamlolile akityanga kunani gha bahali, watilili na kulonga, "Ni ligelawima," na kutova lilolwi kwa makakala kunu wakitila. ²⁷Yesu akawalongela lianja limonga, akilonga, "Muipeghe moyu! ni nenga! mkotoho kutila." ²⁸Petelo amyangili kwa kulonga, "Bambu, handa niwenga, nilaghili nihiki kwa wenga kunani gha masi." ²⁹Yesu akalongela, "Uhiki." Hinu Petelo akahuma mghati gha wato na akatyanga kunani gha masi kuyenda kwa Yesu. ³⁰Ila Petelo paalolile mawmbi, atilile, na kutumbula kudidimila mmasi, akakema kwa lilowi na kulongela, "Bambu, nilokoli!" ³¹Kwa kuloposela Yesu akalangiha liwoko lyaki akamuyinula Petelo, na kumlongela, "Wenga mweni ukwinila msokombi, kwa kyani uwelili na holu?" ³²Ndiwa Yesu na Petelo wkayingila kuwato, liyegha likaleka kuwumba. ³³Wavulwa muwato wakamtundamila Yesu na kulongela, "Chakaka wenga ni Mwana wa Sapanga." ³⁴Na pawahubuka kala, wakahika kumlima wa Genesaleti. ³⁵Na wandu kumahala pala pawammanyile Yesu, wayeghili ujumbi kila mahala gha mmbali, na kuyegha kila mwenikuwela mvina. ³⁶Wamluwili yiwa wawesi kuyavisa luvinko lwa nguu ghaki, na watangala walamisilwi.

15

¹Ndiwa Mafalisayu na wayandika wakahika kwa Yesu kuhuma ku Yelusalemu. Na kulongela, ²"Kwa kyani wavulwa wangungingama mapokelo gha wagogolo? Kwaikiva wanguwofola ng'ogha mawoko ghau pawangulyegha mulyo." ³Yesu akawayanga na kuwalongela, "Mwenga- kwa kyani mngungingama selia gha Bambu kwaikiva gha mapokelo gha mwenga?" Kwaikiva Sapanga alongile, Mutundamili tati ghako na nyongo ghako; na 'Mweni kulonga uhakata kwa tati ghaki na nyongo ghaki, chakaka atehova,' ⁵Ila mwenga mngulonga, 'Kila mwenikumlongela tati ghaki na nyongo ghaki, "' Kila mtanga uvile angalipokela kuhuma kwa nenga hinaa ni hupo kuhuma kwa Sapanga,'" ⁶"Mundu hayu kana lukani ng'ogha lwa kumtundamila tati ghaki. Kunjila hai mlitenyula lilando lya Sapanga kwaikiva gha mapokelo gha mwenga baha. ⁷Mwenga wambindingu, ni maha handa Isaya vila kalota kunani gha mwenga paailongile, ⁸Wandu hagma wangunitundamila nenga kwa milomu ghau, ila mioyu ghau iwela kutali na nenga. ⁹Wanguniyupa yaghi yaghi, kwaikiva wanguvula wavulo yenikuwela malaghilo gha wandu." ¹⁰Ndiwa akawakema makongano na kuwalongela, "Myughanili na mmanyi- ¹¹Kwahela kindu kyeni kuyingila kumlomu mwa mundu na kughola ndaka. Ila, kila kyeni kuhuma kumlomu, haki ndiwa kyei kumghola mundu kuwela ndaka." ¹²Ndiwa wavulwa wakamuyendela na kulonga na Yesu, "Ghuli, Ungumanya Mafalisayu pawaliyoghanila lila lilando wahyomili nesu?" ¹³Yesu awayangile na kulonga, "Kila mmela uvile tati ghangu kautkulila ng'ogha utetupulwa. ¹⁴Muwaleki weka, weni ni vilongosi wangali kulola. Handa mundu angalikulola atemulongosa angalikulola myaki, wogha waivili wateguwila mulyumba." ¹⁵Petelo akayanga na kumlongela Yesu, "Tulongeli mlandanu hau, ¹⁶Yesu akayanga, "Na mwenga hilahila mwambila kumanya?" ¹⁷Mwenga mlola ng'ogha yiwa kila kyeni kuyingila kumlomu kinguyingila mumtima na kuyenda kuchou?" ¹⁸Ila vindu vyogha vyenikuhuma kumlomu vinguhuma mghati gha moyu. ¹⁹Ndiwa vindu vyenikumtaya mundu ndaka. Kwaikiva kumoyu kunguhuma mawachilo mahakata, ukoma wandu, ungongola, udukisi, wihi, uhighiliswa wa uhwangi, na malighu. ²⁰Hagma hyogha ndiwa mihalu yeni kumtaya mundu ndaka. Ila kulyegha kwa kukotoho kuwofula mawoku kungumghola ng'ogha mundu kuwoneka ndaka. ²¹Ndiwa Yesu akahuka kumahala pala na akajivika weka kuyendela mbandi zya Tilo na Sidoni. ²²Ulolili akahika mdala mkanani kuhuma mbandi hazi. Akatova lilowi akilonga, "Niwoneli luhungu, Bambu, Mwana wa Daudi; biti ghangu angughaswa nesu na lihoka, ²³"Ila Yesu kamyanga ng'ogha lilando. Wavulwa ghaki wakahika wakamluwa, wakilonga, "Muhumisi ayendi zyaki, kwaikiva angututovela lilowi." ²⁴Yesu awayangili na kulonga, "Nilaghilwa ng'ogha kwa mundu yeyosi ila kwa kondolu wayaghamikili wa lighuta lya Izilaeli." ²⁵Ila akahika na kugondama kuulongolo ghaki, akilonga, "Bambu nitangi." ²⁶Amyangili na kulonga, "Ng'ogha maha kutola mulyo wa wana na kuwadangila ghalu." ²⁷Akalonga, hata nagma ghalu wanung'una wangulyegha mulyo weni kuguwa mmesa gha Bambu wau." ²⁸Ndiwa Yesu akayanga na akilonga, "Mdala, ukwinila ghako ni mkulu. Na igholeki kwa wenga handa vila ungupal." na biti ghaki awelili kalamiswa kulipindi lila. ²⁹Yesu ahukili kumahala pala na kuyenda pabehi na bahali gha Galilaya. Hinu akayenda kunani gha mitombi na kulikala haku. ³⁰Lipinga likulunga likahika kwa mweni. Na kumyeghela walemafu, wangali kulola, wangali kulonga, na walemafu waghanga wa wekaweka, wenikuwela wavina. Wawavikili kumaghulu gha Yesu na akawalamisa. ³¹Na makongano wakalikangasa pawalolile wanalikulonga wakilonga, na walemafu wakilamiswa, viweti wakityanga, na wangali kulola wakilola. Wamyinulile Sapanga wa Izilaeli. ³²Yesu akawakema wavulwa ghaki na kulongela, "Niawonela luhungu konganiko, kwaikiva wawela na nenga kwa lipindi lya machuwa itatu walyegha ng'ogha chochosi. Nitewataula ng'ogha wayendi ukaya wakiva walyegha ng'ogha, wakotoho wakahyunga mnjila." ³³Wavulwa ghaki wakamlongela, "Ni kugha tunguwesa kupokela mibumunda gha kukwila haku kumanyahi kughola lipinga likulunga handa nagma likayukwite?" ³⁴Yesu akawalongela, "Mvili na mibumunda mininga?" Wakalonga, "Isaba, na himba wanung'una mayaghani." ³⁵Yesu akawalaghila lipinga litami pahi. ³⁶Aitolile hila mibumunda isaba na homba, na badili gha kushukwile, akaimetula na kuwapegha wavulwa. Wavulwa wakawapegha lipinga. ³⁷Wandu wogha wakalyegha na kukwila. Na wakakungula mahighalo gha vipandi vya mulyo vihighalile vipandi vipandi, vimemili vijeja isaba. ³⁸wogha walyeghili wawelili walumi ielufu inne ukileka wadala na wana. ³⁹Hinu Yesu akalitaula lipinga wayendi zyau na akayingila mghati gha wato na kuyenda kumahala gha Magadani.

¹Mafalisayu na Masadukayu wakamuhikila na kumyesa Yesu awalangihi kilakihi kila kinguhuma kunani. ²Ila Yesu awayangili na kuwalongela yiwa, Ikiva ni lumih mngulonga yiwa kuchia na mahindu, kwaikiva kunani ni kungeli. ³Na malawila mngulonga, 'Lelo kuchia ng'ogha maha kwaikiva kunani kuwela kwa langi gha ngeli na mahindu yagubika kunani kogha.' Mngumanya kuwela na mwanja pakunani kuwoneka havi, ila muwesa ng'ogha kuwela na mwanja kwa kulola kilangihi kya lipindi. ⁴Kiwelekwa kihakata na kya ungongola kinguhakula kilangihi, ila kwahela kilangihi chochosi kiteyeghwa, ila kila kya Yona. Hinu Yesu akawaleka na kuyenda zyaki. ⁵Wavulwa wakahika mbando gha ivili, ila wawelili waliwasuwa kutola mibumunda. ⁶Yesu akawalongela, "Mlikali mihu na simika gha Mafalisayu na Masadukay." ⁷Wavulwa wakakonyana weni kwa weni na kulongela, "Ni kwaikiva titila ng'ogha mibumunda." ⁸Yesu amanyili hali na kulonga, "Mwenga weni ukwinila msokombi, kwa kyani muliwachila nagha na kulongelana paghati gha mwenga yiwa ni kwa kyani mpapili ng'ogha mibumunda?" ⁹Ghuli mwambla kumanya wala kukumbwike hila mibumunda mihitano kwa wandu ielufu itano, na vibeba vininga mvikungulile? ¹⁰Au mibumunda isaba kwa wandu ielufu nne, na ni vibeba vininga mtolili? ¹¹Iwela ghuli hata mkotoho kumanya yiwa niwelili nilonga ng'ogha na mwenga kulongelela mibumunda? Mjiviki maha na mjiviki kutali na simika gha Mafalisayu na Masadukayu." ¹²Hinu wakamanya yiwa awelili kawalongela ng'ogha kulikala mihu kwa habali gha mibumunda yeni simika, ila kulikala mihu na mavulo gha Mafalisayu na Masadukayu. ¹³Lipindi Yesu paahikili kumahala gha Kaisalia gha Filipi, akawakonya wavulwa ghaki, akilonga, "Wandu wangulonga yiwa Mwana wa Mundu ni ghani?" ¹⁴Wakalonga, "Waghangi wangulonga yiwa ni Yohana Mbatisa; waghangi, Eliya; na waghangi Yelemia, au mmonga wa walota. ¹⁵Akawalongela, hinu mwenga mngulonga yiwa nenga na ghani? ¹⁶Akiyanga Simoni Petelo akalonga, "Wenga ni Kilisito Mwana wa Sapanga mwenikuwela mkomu." ¹⁷Yesu akamuyanga na kumlongela, "Uhigilwa wenga, Simoni Bar Yona, kwaikiva mwahi na liwoundu likugubutulila ng'ogha hali, ila tati ghangu mwenikuwela kundumba. ¹⁸Na nenga hilahila ningukulongela yiwa wenga ni Petelo na kunani gha mghomba hau nitelichenga lipinga lya wamkwini Kilisito. Milyangu gha kumambi itelisinda ng'ogha. ¹⁹Nitekupegha wenga funguu zya unkosi wa kundumba. Chochosi utekiwopa kumlama kitewela kiwopwa kundumba, na chochosi utekiwoposola kumlama kitewela kiwoposolwa kundumba." ²⁰Hinu Yesu akawalongela wavulwa wakotoho kumlongela mundu yeyosi yiwa mweni awelili ni Kilisito. ²¹Kuhuma lipindi lila Yesu atumbulile kuwalongela wavulwa yiwa ni lasima ayendi Yelusalemu, kuhakilwa kwa mighalu itangala kumawoku gha wagogolo na wakulu wa watambika na wayandika, kukomwa na kuhindulwa lichuwa lya itatu. ²²Hinu Petelo akamtola Yesu mmbali na kumkalipila, kwa kulongela, "Mghalu hau na uweli kutali na wenga, Bambu, hali likotoho kuhumila kwa wenga. ²³Ila Yesu akahyuka na kumlongela Petelo, "Uhuyi kuyetu kwa nenga lihyukana! Wenga ni kingingamu kwa nenga, kwaikiva wenga ungulolesa ng'ogha mighalu gha Sapanga, ila mighalu gha wandu." ²⁴Hinu Yesu akawalongela wavulwa ghaki, "Paikawela mundu yeyosi kapala kunikovekela nenga, ni lasima alikani mweni, atoli lipingika lyaki, na anikovekeli. ²⁵Kwaikiva mweni kupala ukomu ghaki ateuyalamisa, na kwa yeyosi mwenikuyalamisa ukomu ghaki kwaikiva gha nenga ateulokola. ²⁶Ghuli! Hupu ghani atepokela mundu pakapokela mlima wogha ila akayalamisa ukomu ghaki? Ghuli! Ni niki atetola mundu kukupeghana nan ukomu ghaki? ²⁷Kwaikiva Mwana wa Adamu atehika kuukwilikihi wa Tati ghaki na watumikila ghaki wa kundumba. Na mweni atemhipa kila mundu kukovekelana na matendu ghaki. ²⁸Chakaka ninguwalongela kuvile na amonga gha mwenga mwenga mgholoka baha wateyesa ng'ogha kihu mbaka pawamlola Mwana wa Adamu akihika kuunkosi ghaki.

¹Machuwa isita kuulongolo Yesu awatolile pamonga na mweni Petelo, na Yohana, na Yakobo mlangu ghaki, na akayenda nau mbaka kunani gha litombi litali. ²Aghalambulilwi kuulongilo gha weni. wuso ghaki ukang'anyima handa lijuwa, na nguu zyaki ziwonekanili zyezi kung'ala handa mhana. ³Uloli, pala wahumilili Musa na Eliya wakilongela na mweni. ⁴Petelo akayanga na kumlongela Yesu, "Bambu, ni maha kwa twenga kuwela mahala baha. Handa paupala, nitechenga haku vibimilo viitatu- kimonga kya ko, na kighangi kwaikiva gha Musa, na kimonga kwaikiva gha Eliya." ⁵Lipindi angulongela, uloli lihindu mbuleti likawataya kisisi, na uloli, likahumila lilowi kuhuma kumahindu, likilonga, "Hayu ni mwana ghangu mpalwa ninguhekeleswa nayu. Mumyoghanili mweni." ⁶Wavulwa pawayoghanila hagha, wakaguwa kifufufu na wakatila nesu. ⁷Hinu Yesu akahika akawayavisa na kulonga, "Myinuki na mkotoho kutila." ⁸Na weni wakayinula wusu ghau kunani wamlolile ng'ogha mundu ila Yesu weka yaki. ⁹Na pawawelili wakihuluka kulitombi, Yesu akawalaghila, akilonga, "Mkotoho kulongela habali gha mawonu hagha mbaka pala Mwana wa Adamu lipindi atehindulwa kuhuma kukihu." ¹⁰Wavulwa ghaki wakamkonya, wakilonga, "Ni kwa kyani wayandika wangulonga yiwa Eliya atehika mtumbulo?" ¹¹Yesu akawayanga na kulongela, "Eliya atehika chakaka na atehuyisa mighalu hyogha. ¹²Ila ninguwalongela mwenga, Eliya kahika kala, ila wammanya ng'ogha. Badili ghaki, wamgholilile mighulu wapalile weni. Na havi ndiwa Mwana wa Adamu atehakilwa kumawoku ghau." ¹³Ndiwa wavulwa wakamanya yiwa awelili akilongela habali gha Yohana Mbatisa. ¹⁴Pawahika kulipinga lya wandu, mundu mmonga amyendelili, akatova manung'una kuulongolo ghaki, na kumlongela, ¹⁵"Bambu, umuwoneli luhungu mwana ghangu, kwaikiva kawela na kifwafwa na kughasika nesu. Kwaikiva mianja itangala anguguwa mlyoto au kumasi. ¹⁶Nimyegehili kwa wavulwa ghako, ila wawesili ng'ogha kumlamisa." ¹⁷Yesu akayanga akilonga, Mwenga kiwelekwa kikwinila ng'ogha na kiyalamika, nitelikala pamonga na mwenga mbaka ligha? Nitefumililana na mwenga mbaka ligha? Myeghi kwa nenga." ¹⁸Yesu amkalipilili, na lihoka likamuhika. mhangolo alamisilwi kuhuma liaa lila. ¹⁹Hinu wavulwa wakamuhikila Yesu kwa kifisu na kumkonya, "Kwa

kyani tusindilwi kumuwinga?"²⁰Yesu akawalongela, "Kwaikiva gha ukwinila wa mwenga msokombi. Chakaka ninguwalongela, handa mtewela na ukwinila hata msokombi handa mbunji gha mbeyu gha haladali, mtewesa kuulongela litombi hali, uhuki kuhuma baha na uyendi kula, na lweni litehuka na kutewela ng'ogha na kindu chochosi kya kusindikana kwa mwenga."²¹(uwiki mkasu: Milando gha msitali wa 21 "Ila ndambu hai gha lihyukana litehuka ng'ogha, ila kwa mayupo na kuwopa mulyo" yawonekana ng'ogha ku mayandiko gha dahile).²²Lipindi pawambila ku Galilaya, Yesu akawalongela wavulwa ghaki, "Mwana wa Adamu atekamukwa mumawoku gha wand."²³Na wahusutu, na lichuwa lya itatu atehinduka," Wavulwa wanyengemangili nesu."²⁴Na weni pawahikili ku Kapenaumu, wandu weni kukungula kodi gha nusu shekeli wakamuyendela Petelo na kulongela, "Ghuli mvula wa mwenga anguhipa kodi gha nusu shekeli?"²⁵Akalonga, "Hina" Ila Petelo pakayingila mghati gha lighuta, Yesu akalongela na Petelo mtumbulo na kulongela, "Unguliwachila niki Simoni? Wankosi wa mlimawogha, wangupokela kodi au usulu kuhuma ghani? Kwa wala wenikuwalongosa kuhuma kwa wahlenja?"²⁶Na lipindi Petelo pailongile, "Kuhuma kwa wahlenja" Yesu akamlongela, hinu weni kulongoswa wahumiswa kukuhipa kodi.²⁷Ila tukotoho waghola wakungula usulu wakaghola sambi, uyendi kubahali, utaghi ndoana, na umtoli yula homba mweni kuhika mtumbulo. Badili gha kuwoposola mlomu ghaki, utelola mula shekeli imonga. Itoli na uwapeghi wakungula usulu kwaikiva gha nenga na wenga.

18

¹Lipindi lilalila wavulwa wakahika kwa Yesu na kumlongela, "Ni ghani mweni kuwela mkulu kuunkosi wa kundumba?"²Yesu akamkema mwana mnung'una, akamvika paghati gha weni,³na kulongela, "Chakaka ninguwalongela, pamleka ng'ogha sambi na kuwela handa wana wanung'una mtewesa ng'ogha kuyingila kuunkosi wa kundumba."⁴Hinu yeyosi mweni kujihulusa handa mwana mnung'una, mundu hayu ni mkulu kuunkosi wa kundumba.⁵Na yeyosi mwenikumpokela mwana mnung'una kwa lihina lyangu kanipokela nenga.⁶Ila yeyosi mwenikuyambusa mmonga paghati gha wanung'una hagma weni kunikwinla kuhyuka, itewela maha kwa mundu hayu liganga likulu lya kuhyaghila likawopwa muntandala ghaki, na kudubukizwa mmasi gha kina kitali mbahali.⁷Chondi kwa mlimawogha kwaikiva gha lipindi lya kuhyomelwa! kwaikiva kuwela ng'ogha na mhyeto wa lipindi hali, la chondi kwa mundu yula lipindi hali litehika kwaikiva gha mweni!⁸handa liwoku lyako au lighulu lyako palikuyambusila kuhyoma, lidumuli na kulitaghila kutali. Ni mbaha nesu kwa wenga kuyingila kuukomu ukawela ng'ogha na liwoku au mlemafu, kupiti kutaghwa kulyoto lya machuwa yayendelala ukawela na mawoku hyogha au maghulu hyogha.⁹Handa lisu lyaku palikuyambusa uguwi, ulitupuli na ulitaghi kutali na wenga. Ni maha nesu wenga uyingili kuukomu na lisu limonga, kupiti kutaghwa kulyoto lya machuwa yayendelela ukiva na malisu ghako hyogha maivili.¹⁰Mloli yiwa mkotoho mkampughanya mmonga wa wanung'una hagma. Kwaikiva ninguwalongela yiwa kundumba kuvile na watumikila wa kundumba wa Sapanga weni machuwa hyogha wanguulola wuso wa Tati ghangu mwenikuwela kundumba.¹¹(Uwikili mkasu: Milando yeni kuwoneka handa musitali wa 11, "Kwaikiva Mwana wa Adamu ahikili kulokola kila kiwelili kiyalamika" yawoneka ng'ogha kumayandiko maha gha dahile)¹²Mnguliwachila niki? Paikawela mundu kana kondolu imia imonga, na mmonga wa weni akayaghamika, ghuli atewaleka ng'ogha itisini na itisa kulitombi na kuyenda kumuhakula mmonga mweni kuyaghamika?¹³Na pakamkola, chakaka anguwalongela, angumuhekelelela kupiti wala itisini na itisa weni kuyaghamila ng'ogha.¹⁴Hilahila, ng'ogha mapalo gha Tati gha mwenga wa kundumba kuwela mmonga wa wanung'una hagma ayaghamili.¹⁵Handa mlongu ghako kakuhakila, uyendi, ukamlangihi uhakata uwelili kakugholela mkiva weka yenu. Handa pakakuyoghanila, utewela umuhuyisa mlongu ghaku.¹⁶Ila paikawela kakuyoghanila ng'ogha, umtoli mundu mmonga au waivili kupiti pamonga na wenga, kwaikiva kwa mlomu gha wandu waivili au waitatu kila lilando linguwesa kuhighiliswa.¹⁷Na paikawela kapughanya kuwayoghanila, uwalongeli lipinga lya wamkwinila Kilisito mghalu hau, handa akapughanya hilahila kuyoghanila lipinga lya wamkwinila Kilisito, hinu na aweli handa mundu wa mlima na mkungula usulu.¹⁸Chakaka ninguwalonge, chochosi kila mtekiwopa kumlimawogha na kundumba kitewopwa. na chochosi mtekiwopola kumlima na kundumba kitewoposolwa.¹⁹Kangi ninguwalongela yiwa handa wandu waivili paghati gha mwenga pawajumilana kunani gha mghalu wowosi kumlima lila wanguliypa, hali tati ghangu wa kundumba atelighola.²⁰Kwaikiva waivili au waitatu pawakonganika pamonga kwa lihina lyangu, nenga niwela paghati ghau.²¹Kangi Petelo akahika na kumlongela Yesu, "Bambu, ni mianja mininga mlongu ghangu pakanikakila nanenga nimlekeseli? Hata mihanja isaba?"²²Yesu akamlongela, "Nikulongela ng'ogha mianja isaba, ila hata isabini mianja isaba."²³Kwaikiva gha nagma unkosi wa kundumba ni handa na unkosi utenu mweni kupala kulekebisa mbandi kuhuma kwa wahusutu ghaki.²⁴Paatumbulili kulekebisa mavalangu, mhusutu mmonga akayeghwa kwa mweni avile angumdai talanta ielufu ikumi.²⁵Kwaikiva kawela ng'ogha na njila gha kuhipa, bambu ghaki alahilili awuswi, mhumbu ghaki pamonga na wana ghaki na kila kindu kawela nachu, na mahipo yagholeki.²⁶Hinu mhusutu aguwili, akatova manung'una kuulongolo ghaki, akilonga, 'Bambu, uweli na ufumilifu pamonga na nenga, na nitekuhipa kila kindu.'²⁷Hini yula bambu wa yula mhusutu, kwaikiva ahukumilwi nesu na luhungu, amlekili na kumlekesela lideni hali.²⁸Ila mhusutu yula ahukili na kumlola mmonga paghati gha wahusutu wayaki, awelili angumdai dinali imia imonga. akamkola na kumtova lingaka, na kumlongela, 'unihipi kila ningukudai.'²⁹Ila yula mhusutu myaki aguwili na kumlwa nesu, akilonga, 'Uweli na ufumilifu na nenga, nitekuhipa.'³⁰Ila mhusutu yula wa mtumbulo akanili. Badili ghaki, ayendili na kumtagha mgelesa, mbaka pala paatempegha kila angumdai.³¹Na pawalolile wahusutu wayaki kila kihumilile. Wang'ung'ulikili nesu. Wakahika na kumlongela Bambu ghau kila kindu kihumilile.³²Ndiwa yula Bambu wa mhusutu yula akamkema, na kumlongela, 'Wenga mhusutu mhakata, nikulekeselili wenga lideni lyangu lyogha kwaikiva uniluwili nesu.'³³Ghuli! Upalilwe ng'ogha kuwela na luhungu kwa

hayu mhusutu myako, handa nenga vila nikuwonelele luhungu?³⁴ Bambu ghaki ahyomili na kumyegha kwa wala wenikuhakila mbaka paatehipa lideni lyogha apalilwe kuhipa.³⁵ Hinu ndiwa tati ghangu wa kundumba vila atewagholela, handa kila mmonga wa mwenga atemlekesela ng'ogha mlongu ghaki kuhuma kumoyu."

19

¹Thumilie lipindi Yesu paayomolile milando hila, akahuka Galilaya, na akayenda kumimbaka gha Yudea kuulongolo gha mlweni Yoludani. ²Lipinga likulunga likamkovekela, na akawalamisa. ³Mafalisayu wakamuhikila, wakamuyesa, wakamlongela, "Ghuli ni maha kwa mundu kumleka mhumbu ghaki kwa lukani lolosi?" ⁴Yesu akamuyanga na kulonga, "Msoma ng'ogha, yiwa hayu mweni kuwalumba mtumbulo alumbili mlumi na mdala?" Na kang'akalonga, 'Kwaikiva gha nagma mlumi atemleka tati ghaki na nyongo ghaki na kukongine na mhumbu ghaki, na weni waivili watewela mhigha mmonga?' ⁶Hinu ng'ogha waivili kang'akalonga, 'Ila mhigha mmonga. Hinu, kila kakikonganisa Sapanga, mundu yeyosi akotoho kukilekanisa.'" ⁷Wakamlongela, "Hinu kwa kyani Musa atulaghilile kuhumisa lihamba lya mlekana na kumleka?" ⁸Akawalongela, "Kwa ugangamalu wa mwenga wa moyu Musa akawalaghila kuwaleka wahumbu gha mwenga, ila kuhuma mtumbulo iwelili ng'ogha nagma. ⁹Ninguwalongela, yiwa yeyosi atemleka mhumbu ghaki, ila kwaikiva gha ngongola weka, na akamposa mghangi, kaghola kala ngongola. Na mlumi atemposa mdala alekilwi kaghola ngongola." ¹⁰Wavulwa wakamlongela Yesu, "Handa ndiwa inguwela kwa mngwana na mhumbu, ng'ogha maha kuposa." ¹¹Ila Yesu akawalongela, "Ng'ogha kila mundu anguwesa kupokela mavulo hagma, ila ni kwa wala weni kulekeselwa kupokela. ¹²Kwaikiva wawela wambendi wenikuweleka kuhuma kumtima wa nyongu ghau. Na hilahila kuvile na wambendi waghoolilwe na wandu. Na kuvile na wambendi wajigholile wambendi kwaikiva gha unkosi wa kundumba. Mweni kuwesa kupokela mavulo hagma na ayapokeli." ¹³Hinu akayeghelwa amonga gha wana wanung'una ili awavikili mawoku kunani ghau na kuluwa, ila wavulwa ghaki wakamlalipila. ¹⁴Ila Yesu akalonga, "Muwalekeseli wana wanung'una, hata mkotoho kuwalemesa kuhika kwa nenga, kwaikiva unkosi wa kundumba ni wa wandu handa hagma. ¹⁵Na mweni akavika mawoku ghaki kunani kwa weni, na hinu akahuka pala. ¹⁶Uloli mundu mmonga akahika kwa Yesu kusema, "Mvula, ni kindu ghani kya mahaeli ningupalwa kughola ili mbati kuwela na ukomu wa machuwa yayendelele?" ¹⁷Yesu akamlongela, "Kwa kyani ungunikonya ni kindu ghani kya maha? Kuvile na mmonga hela mwenikuwela mmaha, ila handa paupala ukomu kupokela ukomu, ukoli selia zya Sapanga." ¹⁸Yula mundu akamkonya, "Ni selia ghani?" Yesu akalonga, "Ukotoho kukoma, ukotoho kughola ngongola, ukotoho kuhija, ukotoho kulongela uhwangi, ¹⁹watundamili tati ghako na nyongo ghako, na umpali mundu wa pabehi na wenga handa nafusi ghako." ²⁰Mundu yula akamlongela, "Mighalu hyogha hai niighola kala. Nambila kupala niki?" ²¹Yesu akamlongela, "Handa paupala kuwela utimila, uyendi ukawusi vila uwela navyu, na uwapeghi wangali hindu, na utewela na ngoku kundumba. na hinu uhiki unikovekeli." ²²Ila mhongolo yula pakayoghanila yala Yesu amlongilile, akahuka kwa kunyengemala, kwaikiva awelili kakola hindu itanagala. ²³Yesu akawalongela wavulwa ghaki, "Chakaka ninguwalongela, ni yuyughu ng'ogha kwa mundu mnaisa kuyingila kuunkosi wa kundumba. ²⁴Kangi ninguwalongela, ni yuyughu kwa ngamia kuyingila kulilanga lya sindanu, kupiti kwa mundu mnaisa kuyingila kuunkosi wa Sapanga. ²⁵Wavulwa pawayoghanila nagma, walikangasili nesu na kulonga, "Ni ghani hinu atelokoka?" ²⁶Yesu akawalola na kulongela, "Kwa wandu hali linguwesekana ng'ogha, ila kwa Sapanga hyogha yanguwesekana." ²⁷Hinu Petelo akamuyanga na kumlongela, "Uloli, tuleka vyogha na kukukovekela wenga. Ni hindu ghani tutepokela?" ²⁸Yesu akawalongela, "Chakaka ninguwalongela, yula mweni kunikovekela nenga, kuuweleka hyonu lipindi Mwana wa Adamu paatetama kukikalilo kya ukulu kya ukwilikihi ghaki, mwenga hilahila mtetama kunani gha vikalilo ikumi na ivili vya ukulu, kuwalamula makabila ikumi na ivili. ²⁹Kila mmonga wa mwenga mweni kuleka lighuta, mhaja, mhacha, tati, nyongo, wana, au litawa kwaikiva gha lihina lyangu, atepokela mianja imia na kulihiki ukomu wa machuwa yayendelele. ³⁰Ila watangala wenikuwela wa mtumbulo, watewela wa kumwihu na wenikuwela wa mwihu watewela wa mtumbulo.

20

¹Kwaikiva unkosi wa kundumba ungulandana na mkola litawa, mwenikulamuka malawila njenji ili kuajili waghola lihengu kulitawa lyaki lya misabibu. ²Badili gha kuwela kajumilana na waghola lihengu dinali imonga kwa lichuwa lyogha, awalaghilile kuyenda kulitawa lyaki lya misabibu. ³Ayendili kang'akalonga, 'Mwenga hilahila, myendi kulitawa lya misabibu, na chochosi kyeni umaha nitewapegha.' Hinu wakayenda kughola lihengu. ⁴Akayenda kang'akalonga, 'Mwenga hilahila, myendi kulitawa lya misabibu, na chochosi kyeni umaha nitewapegha.' Hinu wakayenda kughola lihengu. ⁵Akayenda kang'akalonga, 'Mwenga hilahila, myendi kulitawa lya misabibu, na chochosi kyeni umaha nitewapegha.' Hinu wakayenda kughola lihengu. ⁶Lianja lighangi kang'akalonga, 'Mwenga hilahila, myendi kulitawa lya misabibu, na chochosi kyeni umaha nitewapegha.' Hinu wakayenda kughola lihengu. ⁷Wakamlongela, kwaikiva kwahela mundu yeyosi mwenikutupegha lihengu. ⁸Akawalongela, 'Na mwenga hilahila myendi kulitawa lya sabibu.' ⁹Lipindi lya lumihi palihika, mweni lighuta lya misabibu akamlongela mgholokela ghaki, 'Uwakemi waghola lihengu na uwahipi misahala ghau, kwa kutumbula na wa kumwihu mbaka wa mtumbulo.' ¹⁰Pawahikile wala weni kuajiliwa lisaa lya ikumi na imonga, kila mmonga wa weni apokelili dinali. ¹¹Pawahikile waghola lihengu mtumbulo, waliwachilile yiwa watepokela kupiti, ila hilahila wapokelili kila mmonga dinali imonga. ¹²Badili gha kupokela mapesa ghau, wamlalamikile mkola wa lila litawa. ¹³Wakalonga, 'Hagma waghola lihengu wa kumwihu watumilile lisaa limonga hela kukughola lihengu, ila uwapeghili handa twenga, twenga tupapa mhighu kwa lichuwa lyogha na kukongine na lyoto ukamala.' ¹⁴Ila mweni litawa akayanga

na kulongela kwa mmonga wa weni, 'Ghanja, nighola ng'ogha mghalu mhakata. Ghuli! tujumilana ng'ogha na nenga kwa kupeghana dinali imonga? ¹⁴Upokeli kila kyenikuwela ungupalwa kupokela na uyendi zyako. Ni mhekelelu ghangu kuwapegha hagma waghola lihengu niwapatile kumwihu handa wenga. ¹⁵Ghuli! Ng'ogha haki kwa nenga kughola kila nikipalile na hindu ghangu? Au lisu lyako ni lihakata kwaikiva nenga ni mmaha? ¹⁶Hinu wa kumwihu atewela wa mtumbulo na wa mtumbulo atewela wa mwihu. ¹⁷Yesu paawelili akikwela kuyenda Yelusalemu, awatolile wavulwa ghaki ikumi na ivili mmbali, na kuwalongela, ¹⁸"Mloli tunguyenda ku Yelusalemu, na Mwana wa Adamu atevikwa kumawoku gha wakulu wa watambika na wayandika. Watemlamula kihu ¹⁹na watemyegha kwa wandu wa milima ili kumpughanya, kumtova na kumvamba. Ila kulichuwa lya itatu atehinduka. ²⁰Hinu nyongo wa wana wa Zebedayo ahikili kwa Yesu na wana ghaki. Atovili manung'una kuulongolo ghaki na kumluwa kindu kuhuma kwa mweni. ²¹Yesu akamlongela, "Ungupala niki?" Akamlongela, "Ulaghili yiwa hagma wana ghangu waivili walikali, mmonga liwoku lya kuliyila na mmonga liwoku lya soto kuunkosi ghako. ²²Ila Yesu akayanga na kulonga, "Ungumanya ng'ogha kila ungukiluwa. Ghuli! unguwesa kunyweghela kikombi kivile nitekinyweghela?" Wakamlongela, "Tunguwesa." ²³Akawalongela, "Kikombi kyangu chakaka mtekinyweghela. Ila kulikala mbandi ghangu gha liwoku lya kuliyila na soto lihengu lya nenga ng'ogha kuwapegha, ila ni kwa wala wayandalilwa kala na Tati ghangu." ²⁴Wavulwa waghangu ikumi pawayoghanilile hagma, wakanyengemala nesu na wala walongu waivili. ²⁵Ila Yesu awakemili mweni na kuwalongela, "Mngumanya yiwa walongosa wa milima wanguwagholesa, na wakulu wau wangughola kila wapeghilwi na wakulu ghau. ²⁶Ila ikotoho kuwela nagma kwa mwenga. Badili ghaki, yeyosi atepela kuwela mkulu paghati gha mwenga ni lasima aweli mtumikila wa mwenga. ²⁷Na mwenikupala kuwela wa mtumbulo paghati gha mwenga lasima aweli mtumikila wa mwenga. ²⁸Handa vila Mwana wa Adamu kahika ng'ogha kutumikilwa, ila kutumikila, na kuhumisa ukomu ghaki kuwela ukombola kwa watangala. ²⁹Lipindi wakhuma Yeliko, lipinga likulunga limkovekelili. ³⁰Na wawalolile wangali kulola waivili watama mmbali gha njila. Pawayohanila yiwa Yesu awelili angupita, wakatova lilowi nam kulonga, "Bambu, Mwana wa Daudi, utuwoneli luhungu." ³¹Ila lipinga likawakalipila, na kuwalongela mnyamali. Hata nagma, weni wakatova lilowi kupiti na kulongela, "Bambu, Mwana wa Daudi, utuwoneli luhungu." ³²Hinu Yesu agholokili na awakemili na kuwakonya, "Mngupala niwagholeli niki?" ³³Wakamlongela, "Bambu yiwa mihu gha twenga iwoposolwi." ³⁴Hinu Yesu, akiva kakweghwa na luhungu, akayavisa mihu ghau, lihanja lilalila wakapokela uweso wa kulola na wakamkovekela.

21

¹Yesu na wavulwa ghaki wakahika pabehi na Yelusalemu na wakayenda mbaka ku Besfage, kulitombi lya mizeituni, hinu Yesu akawalaghila wavulwa waivili, ²akiwalongela, "Myendi kukimbwani kila kya kuulongolo, na bwitu mtemlola punda kawopwa pala, na mwana punda pamonga na mweni. Muwawoposoli na kuwayegha kwa nenga. ³Ikiva mundu yeyosi pakawalongela chochosi kwa habali gha hali, mtelonga, 'Bambu anguwapala, na mundu hayu bwitu atewalekesela muhiki pamonga na weni. ⁴Mghalu hau uhumulili ni hula ulongelilwi kupitila kwa mlota lasima litimili. Akawalongela, ⁵Walongeli biti Sayuni, uloli nkosi ghako anguhika kwa mwenga, mnyenyekela na akiva kamkwela punda, na mwana punda mlumi, mwanapunda mng'anya. ⁶Hinu wavulwa wakahuka na kughola handa Yesu vila kawalaghila. ⁷Wakamyegha punda na mwanapunda, na na kuvika nguu zyau kunani ghau, na mweni Yesu akatama pala. ⁸Watangala kukongamano walandalili nguu zyau mnjila, na waghangu wadamulile maputula kuhuma kumibiki na kuyandasa mnjila. ⁹Lipinga lyeni kumlongola Yesu na wala wamkovekelile watovili lilowi, wakilonga, "Hosana kwa Mwana wa Daudi! Ni mhighilwa mweni kuhika kwa lihina lya Bambu. Hosana kunani nesu!" ¹⁰Yesu paahikile Yelusalemu, mmbwani wogha ulikangasili na kulonga, "Hayu ni ghani?" ¹¹"Lipinga likayanga, "Hayu ni Yesu Mlota, kuhuma ku Nazaleti gha Galilaya." ¹²Hinu Yesu akayingila kulighuta lya Sapanga akawawinga panji wogha wenikuwela wakiwusa na kuhemela kulighuta lya Sapanga. Hilahila aghalambulili mesa sya waghambula mapesa na vikalilu vya wawusa ngungda. ¹³Akawalongela, "Iyandikwa, 'Lighuta lyangu litekemwa lighuta lya mayupo, ila mwenga mlighola kuwela mbangu gha wapokola." ¹⁴Hinu wangali kulola na walemafu wakamuhikila kulighuta lya Sapanga, na mweni akawalamisa. ¹⁵Ila lipindi wakulu wa watambika na wayandika pawalolile makangaso yalaayagholile, na pawayoghanile wakitova lilowi kulighuta lya Sapanga na kulongela, "Hosana kwa Mwana wa Daudi," Wakolilwe na lilaka. ¹⁶Wakamlongela, "Uyoghanile kila kingulongelwa na hagma wandu?" Yesu akawalongela, "Hina! Ila myesa ng'ogha kusoma, 'Kuhuma kwa milomu gha wana na wana wang'anya wenikuyonga mvile na kuyinulwa kula kutimila?" ¹⁷Hinu Yesu akawaleka na kuyenda panji gha mmbwani ku Besania na kuwonja haku. ¹⁸Malawila paawelili akihuya kummbwani, awelili na njala. ¹⁹Alolile libiki lilela tini mmbali mbali gha njila. Akaliyendela, ila kalola ng'ogha kindu kunani ghaki ila mahamba weka yaki. Akaulongela, "Kukotoho kuwela na matungula kwa wenga machuwa yayendelela kangi." Na bwitu lila libiki likanyala. ²⁰Wavulwa pawalolile, wakalikangasa na kulonga, "Iwela ghuli libiki lilela tini linyala lihanja limonga?" ²¹Yesu akayanga na kuwalongela chakaka ninguwalongela, handa pamkawela na ukwinila na bila holu, mteghola ng'ogha kila kigholikili kwa hali lilela tini hela, ila mtelongela hata hali litombi, utolwi na ukataghwi kubahali, na itegholeka. ²²Chochosi mtekiluwa kwa mayupo, kunu mkikwinila, mtepokela. ²³Yesu paahikile kulighuta lya Sapanga, wakulu wa watambika na wagogolo wa wandu wakamuhikila lipindi paawelili akivula na kumkonya, "Ni kwa ulongosi ghani ungughola mighalu hai? Na nighani mweni kukupegha kughola hali?" ²⁴Yesu akayanga na kuwalongela, "Na nenga hilahila nitewakonya kindu kimonga. pamkanilongela, na nenga hilahila nitewalingela ni kwa ulongosi ghani ningughola mighalu hai. ²⁵Ubatiso wa Yohana-uhumili kugha, kundumba au kwa wandu?" Wakakonyana weni kwa weni, wakilonga, patutelonga uhumili kundumba, atetulongela kwa kyani mumkwinila ng'ogha? ²⁶Ila patulongile, uhumile kwa wandu, tunguwatila makongano, kwaikiva

wogha wangumlola Yohana handa mlota." ²⁷ Hinu wakamyanga Yesu na kulonga, "Tungumanya ng'ogha" Akawalongela hilahila, "Hata nenga nitewalongela ng'ogha ni mkwa ulongosi ghani ningughola mighalu hai." ²⁸ Ila mnguliwachila niki? Mundu mweni wana waivili. Akayenda kwa mmonga na kumlongela, Mwana ghangu, uyendi ukagholi lihengu kulitawa lya misabibu lelo. ²⁹ Mwana akayanga na kulongela, niteyenda ng'ogha, Ila kuulongolo akaghalambula mawachilo ghaki akayenda. ³⁰ Na mundu yula akayenda kwa mwana wa ivili na kulongela kindu kilakila. mwana hayu akayanga na kulongela, niteyenda bambu, ila kayenda ng'ogha. ³¹ Ni ghani paghati gha wana waivili mwenikughola mapalo gha tati ghaki? Wakalonga, "Mwana wa mtumbulo." Yesu akawalongela, "Chakaka ninguwalongela, wakungula usulu na wangongola wateyingila kuunkosi wa Sapanga pambila gha mwenga kuyingila. ³² Kwaikiva Yohana ahikili kwa mwenga kwa njila gha lipala, ila mumkwinila ng'ogha. Na mwenga, pamlola hali likigholeka muyesili ng'ogha kuleka sambu ili kuulongolo mumkwinili. ³³ Myoghanili mlandanu mghangi. Kuwelili na Mundu, mundu mweni mahala kukulu ku mlima. Akalulila misabibu, akaivikila likuta, akagholi na kyombu kya kukamulila divai, akachenga na kindangawala kya waghokela, na akalikodisa kwa wavika sabibu. Hinu akayenda kumlima mghangi. ³⁴ Lipindi lya mabeno gha misabibu palihika pabei, awalaghilile amonga gha watumikila kwa watukutula wa misabibu kutola lihomosi lyaki. ³⁵ Ila watukutula wa sabibu wakawatola watumikila ghaki, wakamtova mmonga, wakamkoma mghangi, na wakamtova mmonga kwa maganga. ³⁶ kwa lianja lighangi, mghokela awalaghilile watumikila waghangi, watangala kupiti wala wa mtumbulo, ila watukutula wa misabibu wakawagholela vilavila, ³⁷ Badili gha pala bambu yula akamlaghila mwana ghaki, akilonga, "Watemtundamila mwana ghangu." ³⁸ Ila watukutula wa misabibu pawamlolile mhongolo yula, wakalongelana, "Hayu ni mlihi, Muhiki, tumkomi na tukamuli ntwenga ulihi." ³⁹ Hinu wakamtola, wakamtagha panje gha litawa lya misabibu na kumkoma. ⁴⁰ Ghuli mkola wa litawa lya misabibu paatehika, atewagholi niki watukutula wa misabibu?" ⁴¹ Wakamlongela, "Atewayaghamila hagma wandu wahakata kunjila gha ukalipa nesu, na hinu atelikodisa kwa watukutula waghangi wa misabibu, wandu wavile watehipa kwa lipindi misabibu paipia." ⁴² Yesu akawalongela, "Msoma ng'ogha kumayandiko, 'Liganga walilemili wachengaji liwela liganga likulunga lya mghomba. Hali lihumile kwa Bambu, na ingukangasa kumihi gha twenga?" ⁴³ Hinu ninguwalongela, Unkosi wa Sapanga utetolwa kuhuma kwa mwenga na kupeghwa mlima hula ungulola lihengu lyaki. ⁴⁴ Yeyosi ateguwa kunani gha liganga hali atetenyulwa vipandi vipandi. Ila kwa yeyosi ateguwilwa na hali litemhyagha. ⁴⁵ Wakulu wa watambika na Mafalisayu pawayoghanile mlandanu ghaki, akalola yiwa anguwalongelela weni. ⁴⁶ Ila kila pawapalile kulangiha mawoku kunani ghaki, watilile makongamano, kwaikiva wandu wamlolile handa mlota.

22

¹ Yesu akalongela kangu na weni kwa milandano, akilonga, ² Unkosi wa kundumba unguwandana na nkosi mweni kuyandala mhambu gha uposo wa mwana ghaki. ³ Akawalaghila watumikila ghaki kuwakema wala wawelili wakemililwi kuhika kumhambu gha uposo, ila wahikile ng'ogha. ⁴ Nkosi awayeghili kangu waghangi, akilonga. "Muwalongeli wogha wenikukemwa, mloli, niyandala mulyo. Likambaku na ndama ghangu weni mahuta wahinjwa, na mighalu hyogha iwela kala, mhiki kumuhambu wa uposo." ⁵ Ila wandu hagma wayakolile ng'ogha hagma kwa upabehi mkemu ghaki. Amonga wahuyili kumatawa ghau, na waghangi wahuyile kumahala ghau gha biasala. ⁶ Waghangi wawayinukile watumikila wa nkosi na kuwapughanisa na kuwakoma. ⁷ Ila nkosi ahyomili. Akalaghila watovangonde ghaki, akawakoma wala wenikukoma na kuuyaghamisa mlima ghau kwa lyoto. ⁸ Hinu awalongilile watumikila ghaki, "Mhambu uwela kala, ila weni kukemwa wawalilwe ng'ogha. ⁹ Kwa nagma myendi kumakongano gha njila kulu, muwakemi wandu watangala ila ingupalwa wahiki kumhambu wa uposo." ¹⁰ Watumikila wayendile njila ngulu na kuwakema wandu wowosi wawalolile, wa maha na wahakata. Hinu kyumba kya uposo kimelile wahlenja. ¹¹ Ila nkosi pakayingila kuwalola wahlenja, amlolile mundu mmonga avile kavala ng'ogha ng'uu gha mhambu! ¹² Nkosi amkonyile, 'Ghanja, uwesa ghuli kuhika haku mghati ukiva uwela ng'ogha na nguu gha mhambu? Na mundu hayu kayanga ng'ogha chochosi. ¹³ Ndiwa nkosi paawalongela watumikila ghaki, "Mumuwo poli mundu hayu mawoku na maghulu na mumtaghi panje kulwisa, haku kuwela kutewela nakililo nakuhyagha malino. ¹⁴ Kwaikiva wandu watangala wangukemwa, ila wahaghulwa ni mayaghani. ¹⁵ Ndiwa Mafalisayu wahukile na kuyandala vila watemkamula Yesu kumilando ghaki mweni. ¹⁶ Ndiwa pawawalaghila wavulwa wau pamonga na Mahelode. Na wamlongilile Yesu, "Mvula, tungumanya yiwa wenga ni mundu wa chakaka, na yiwa unguvula mighalu gha Sapanga kuuchakaka. Ungulolesa ng'ogha mawachilo gha mundu mghangi na unguwonesha ng'ogha upendeleu kwa wandu. ¹⁷ Kwa nagma tulongeli, unguliwachila niki? Ghuli, ni maha kiselia kuhipa kodi kwa Kaisali au ng'ogha?" ¹⁸ Yesu amanyile uhakata ghau na akalonga, "Kwa kyani mnguniyesa, mwenga wambindingu? ¹⁹ Mnilangihi mapesa yangutumika kuhipila kodi." Ndiwa wakamyeghela dinali. ²⁰ Yesu akawakonya, "Wuso na lihina hali ni vya ghani?" ²¹ Wakamyanga, "Vya Kaisali." Ndiwa Yesu akawalongela, "Mumpeghi Kaisali vindu vyeni kuwela vya mweni hayu na vya Sapanga mumpeghi Sapanga." ²² Pawayoghanila nagma wakalikangasa. hinu wakamleka na kuyenda zyau. ²³ Lichuwa hali amonga gha Masadukayu wahikile kwa Yesu, wala wala wenikulonga kwahela uhinduko wa kihu. Wakamkonya, ²⁴ wakilonga, "Mvula, Musa alongili, paikawela mundu kahova akiva kalela ng'ogha wana, mlongu ghaki na amlihi hayu mdala na ampatili mwana kwaikiva fha mlongu ghaki. ²⁵ Kuwelili na walongo isaba. Wa mtumbulo aposili na hinu akahova bila kulela mwana. Akamlekela mhumbu mlongo ghaki. ²⁶ Hinu mlongo ghaki wa ipili na mweni akagholi handa ngagha, hinu yula wa itatu, ikawela nagma mbaka kwa yula wa isaba. ²⁷ Badili gha kughola nagma wogha, yula mdala na mweni akahova. ²⁸ Hinu kuuhinduko ahu mdala atewela mhumbu wa ghani kuwalongo hagma isaba? Kwaikiva wogha wamposili." ²⁹ Ila Yesu awayangile na kuwalongela, "Mngukosela, kwaikiva mmanyana ng'ogha mayandiko hata makakala

gha Sapanga.³⁰ Kwaikiva kuuhinduko, wandu wanguposa ng'ogha hata kuposwa hilahila. Badili ghaki wandu wanguwela handa watumikila wa kundumba wa Sapanga.³¹ Ila kulongelela uhinduko wa wahovili, myesa ng'ogha kusoma kila kivile Sapanga akilongilile kwa mwenga, akilonga,³² Nenga ni Sapanga wa Ibulahimu, Sapanga wa Isaka, na Sapanga wa Yakobo? Sapanga kang'ogha Sapanga wa wahovili, ila ni Sapanga wa weni kuwela wakomu."³³ Lipindi konganiko pawayoghanila hali, wakalikangasa na mavulo hagma.³⁴ Ila Mafalisayu pawayoghanila yiwa Yesu kawanyamalisa Masadukayo, wakajikungula weni kwa pamonga.³⁵ Mmonga wa weni, akiwela mundu wa seli, akamkonya lilando kwa kumyesa.³⁶ Mvula, ni amuli ghani yeni kuwela ngulu kupiti zyogha kuselia?"³⁷ Yesu akamyanga, "Lasima umpali Bambu kwa moyu ghako wogha, kwa mpumulo ghako wogha, na kwa malangu ghako hyogha.³⁸ Hai ndiwa amuli ngulu na gha mtumbulo.³⁹ Na gha ipili ingulandana na hai- Ni lasima kumpala mundu wa pabehi na wenga handa ungujipala mweni.⁴⁰ Selia zyogha na Walota wanguwachilila nesu amuli hazi imbili."⁴¹ Na Mafalisayu pawawelili wambila wajikungula pamonga, Yesu akawakonya lilando.⁴² Akilonga, "Ghuli, mnguliwachila niki kunani gha Kilisito? Mweni ni Mwana wa ghani?" Na wweni wakamyanga, "Ni Mwana wa Daudi."⁴³ Yesu akawayanga, "Ni kwa ndambu niki Daudi ku Mpumulo angumkema Bambu, akilonga,⁴⁴ Bambu amlongelili Bambu ghangu, "Ulikali liwoku lyangu lya kulumi, mbaka panitewaghola wahakata ghako wavikwi pahi gha maghulu ghako?"⁴⁵ Handa Daudi angumkema Kilisito "Bambu," kwa ukulu ghani atewela mwana ghaki?"⁴⁶ Kwahela awesili kumyanga lilando kangi, na kwahela awesili kuyesa kangi kumkonya kangi kuhuma lichuwa lila na kuyendelela.

23

¹Kuulongolo alongelili na lipinga lya wandu na wavulwa ghaki. Akalonga,² Wayandika na Mafalisayu wangukalila kikalilo kya Musa.³ Kwa nagha chochosi wangukilaghila kughola, mgholi kunu mkiwalolesa. Ila mkotoho mkatola matendu ghau, kwaikiva weni wangulonga mighalu hila wawesa ng'ogha kuighola.⁴ Chakaka, weni wanguwopa mihighu mitopa ivile ni yuyuyghu ng'ogha kuipapa, na hinu wanguwapapisa wandu kumakombi ghau. Ila weni wangusoelesa ng'ogha hata kyala kuipapa.⁵ Matendu ghau hyogha wanguyaghola ili walolwi na wandu. Kwaikiva weni wanguutanula ukulu wa masanduku ghau na kuyongesa ukulu wa miviniiku gha nguu zyou.⁶ Weni wanguwala kulikala kumahala kwa wandu wanaisa kumhambu na kuvikalilo vya utundamilo mghati mwa maghuta gha kukonganikila Wayahudi,⁷ na kujambuswa kwa utundamilo kumahala gha kusoku, na kukemwa "Wavulwa" na wandu.⁸ Ila mwenga mngupalwa ng'ogha kukemwa "Wavulwa," Kwaikiva mvile na Mvula mmonga, na mwenga woghani walongo.⁹ Mkotoho kumkema mundu yeyosi haku kumlima kuwela tati gha mwenga, kwaikiva muwela na Tati mmonga weka, na mweni kakundumba.¹⁰ Wala mkotoho kemwa 'Wavula,' Kwaikiva muwela na Mvula mmonga hela, ingumaanisa Kilisito.¹¹ Ila mwenikuwela mkulu paghati fha mwenga atewela mtumikila wa mwenga.¹² Yeyosi mweni kujiyinula atehuluswa. Na yeyosi mweni kujihulusa ateyinulwa.¹³ Ila chondi mwenga wayandika na Mafalisayu, wambindingu! Mnguawopila wandu ukosi wa kundumba. Na mwenga muwesa ng'ogha kuuyingila, na muwalekesela ng'ogha wenikuyingila kughola nagha.¹⁴ (Uwikili mkasu: Musitali wa 14 unguwoneka ng'ogha kumayandiko maha gha daile. Amonga gha mayandiku yanguyongesa musitali hau badili gha msitali wa 12. Msitali wa 14" Chondi mwenga Wayandika na Mafalisayu wambindingu! Kwaikiva mnguawamila weni kuhovilwa na walumi ghau").¹⁵ Chondi mwenga Wayandika na Mafalisayu, wambindingu! Mnguhubuka kungwambu gha bahali kuhika kumghola mundu mmonga akwinili ghala mnguyavula, na pakawela handa mwenga, mngumghola mianja ivili mwana wa kulihwiwa lya lyoto handa mwenga weni vila muwela.¹⁶ Chondi mwenga vilongosi wangali kulola, mwenga mweni kulonga, yeyosi mweni kulapa kwa lighuta lya Sapanga, ng'ogha kindu. Ila mwenikulapa kwa sahabu gha lihuta lya Sapanga, kawopwa na kilapo kyaki.¹⁷ Mwenga wangalikulola wanduyungi, niki ni kikulu kupiti kighangi, sahabu au lighuta lya Sapanga livile lighulula sahabu kwa Sapanga?¹⁸ Na yeyosi mwenikulapa kwa sahabu, ng'ogha kindu. Ila mwenikulapa kwa litambiku liwela kunani ghaki, kawopwa na kilapo kyaki.¹⁹ Mwenga wangali kulola, niki ni kikulu kupiti kighangi, litambiku au kuhanja kya maganga kyeni kughulula litambiku lyeni kuyeghwa kwa Sapanga?²⁰ Kwa ngagha, hayu mwenikulapa kwa kihanja kya maganga angulapa kwa hai na kwa vindu vyogha vyeni kuwela kunani ghaki.²¹ Na mwenikulapa kwa lighuta lya Sapanga, angulapa kwa hali na kwa yula mwenikulikala mghati ghaki.²² Na hayu mweni kulapa kwa kundumba, angulapa kwa kikalilo kya ukulu kya Sapanga na kwa hayu mweni kutama kunani ghaki.²³ Chondi mwenga, Wayandika na Mafalisayu, wambindingu! Kwaikiva mnguhipa zaka kwa bizali, mnaanaa na msusa, ila mnguleka mighalu mitopehu gha selia- haki, luhungu, na ukwinila. Ila hagma mngupalwa kuwela myaghola, na ng'ogha kuleka maghangi kuyaghola.²⁴ Mwenga vilongosi wangali mihu, mwenga mvile mnguchuja mng'ongolo mnunguna ila mngumesa ngamia!²⁵ Chondi mwenga Wayandika na Mafalisayu, wambindingu! Kwaikiva munguwofula panje gha vikombi na panje gha lisinila, ila mghati pamema upokola na kukotoho kuwela na kuikanila mweni.²⁶ Mwenga Mafalisayu wangali kulola, mghululi huti mghati gha kikombi na mghati gha lisinia, ili mbandi gha panje na yeni iweli maha.²⁷ Chondi mwenga, Wayandika na Mafalisayu, wambindingu! Kwaikiva mngulandana na mamambi yeni kupakalwa chokaa, yavile kwa panji yanguwoneka ya maha, ila kwa mghati yamema mihupa gha wahovili na kila kindu kyeni kuwela kindaka.²⁸ Hilahila, na mwenga kwa panji munguwoneka weni haki kuulongolo gha wandu, ila kwa mghati mmema umbindingu na upokola.²⁹ Chondi mwenga, Wayandika na Mafalisayu, wambindingu! Kwaikiva mnguchenga mamambi gha walota na kuyavikila malembu mamambi gha weni haki.³⁰ Mwenga mngulonga, handa tungalikala machuwa gha watati wa twenga, tungaliwela ng'ogha tukongine pamonga na weni kuyita mwahi gha walota.³¹ Kwa nagha mhighilisa weni yiwa ni wana wa hagma wenikuwakoma walota.³² Hilahila mwenga mngutimilisa kumemesa mahala kungupalwa sambu sya watati wa mwenga.³³ Mwenga njoka, wana wa vipilibao, kwa

njila liki mtehyeta ulamulo wa jehanamu?³⁴Kwa nagha, uloli, ninguwalaghila kwa mwenga walota, wandu weni luhala, na Wayandika. Amonga gha weni mtewakoma na kuwawamba. Na amonga gha weni mtewatova hyatu mghati gha maghuta gha kukonganiila Wayahudi gha mwenga na kuwawinga kuhuma mmbwani mmonga mbaka mghangi.³⁵Mwihu ghaki ni yiwa kunani gha mwenga patehumila mwahi wogha wa weni haki weni kuyitwa kumlina, kutumbula na mwahi gha Habili mweni haki mbaka kwa mwahi gha Zakalia mwana wa Balakia, mumkomili paghati gha pakwilikihi na kihanja kya maganga.³⁶Chakaka, ninguwalongela, mighalu hai hyogha iteikola kiwelekwa haki.³⁷Yelisalemu, Yelusalemu wenga mweni kuwakoma walota na kuwatova magaga wala weni kulaghilwa kwa wenga! mianja mininga nikungula wana ghako pamonga handa vila nguku paangukungula wana ghaki paghi gha mbawatilo ghaki, ila ujumilili ng'ogha!³⁸Uloli, lighuta lyako ihighala lipala.³⁹Na nenga ningukulongela, kutumbula hinaa na kuyendeleva utenilola ng'ogha, mbaka pautelonga, 'Kahighilwa hayu mweni kuhika kwa lihina lya Bambu.'"

24

¹Yesu ahukili kulighuta lya Sapanga na kuyenda zyaki. Wavulwa ghaki wakamyendela na kumlangiha maghuta gha lighuta lya Sapanga.²Ila awayangile na kuwalongela, "Ghuli, mulola ng'ogha mighalu hai hyogha? Chakaka ninguwalobgela, kwahela liganga litehighala kunai gha lighangi likalekwa kubomolwa."³Na paatamili kulitombi lya mzeituni, wavulwa ghaki wamyendelili kwa uweka na kulonga, "Utulongeli, mighalu hai iteumila ligha? Niki kitewela kilangihi kya kuhika kwa wenga na mwihu gha mlimawogha?"⁴Yesu awayangile na kuwalongela, "Muweli mihu yiwa akotoho kuhika mundu na kuwabyodosa.⁵Kwaikiva watangala watehika kwa lihina lya nenga. Watelonga, 'Nenga ndiwa Kilisito,' na watewabyodosa watangala.⁶Mteyoghanila ngondu na malongelo gha ngondu. Mloli mkotoho mkawela na holu, kwaikiva mighalu hai ingupalwa ihumili; ila hila mwihu utewela wambila.⁷Kwaikiva mlima uteyinuka kwa mlima mghangi, na unkosi kwa unkosi mghangi. Kutewela na njala na mahighimilo gha mlima kumahala wekaweka.⁸Ila mighalu hai hyogha ni mtumbulo weka wa utungu wa kuiwopola⁹Ndiwa watewatola kwaikiva gha mahakilo na kuwakoma. Mtehyomelwa na milima hyogha kwaikiva gha lihina lyangu.¹⁰Ndiwa watangala watelikwala na kuhyukwa na watehyomelana weni kwa weni.¹¹Walota watangala wa uhwangi watehumila na kuwangonga watangala.¹²Kwaikiva uhakata uteyongeseka, upalo wa wandu watangala utepola.¹³Ila yulamatefumilila mpaka kumwihu, atelokolwa.¹⁴Hai Habali Maha gha unkosi itetangaswa kumlimawogha handa uhighilisu kwa milima hyogha. Na ndiwa hula mwihu utehika.¹⁵Kwa nagha, pamtelola uhakata wa uyalamiso, hula ulongelilwi na mlota Danieli ligholoka kumahala pakwilikihi (mwenikusoma na amanyi),¹⁶ndiwa wala wenikuwelaku Yuda watuilili kulitombi.¹⁷Na yula mweni kuwela kunani gha lipaghala lyam lighuta awesi ng'ogha kuhuluka pahi kutola kindu chochosi kuhuma mghati gha lighuta lyaki,¹⁸na yula mweni kuwela kulitawa akotoho kuhuya kutola nguu ghaki.¹⁹Ila chondi kwa wala weni mwana na wala weni kuyonga kumachuwa hagma!²⁰Mluwi yiwa kutuwa kwa mwenga kukotoho kuwela lichuwa lya lupepo, wala lichuwa lya Sabato.²¹Kwaikiva kutewela na lung'ai ngulu, ivile iwoneka ng'ogha kuhuma kulumbwa kwa mlimawogha mbaka hinaa, na hata itewoneka ng'ogha kangi.²²Handa machuwa hagma yangaligholwa ng'ogha kuwela mahupi, kwahela mweni kuwesa lulokoka. Ila kwaikiva gha wahaghulwa, wachuwa hagma yategholwa yaweli mahupi.²³Hinu paikawela mundu yeyosi atewalongela, 'Uloli, Kilisito kahaku! au, 'Kilisito kakula' mkoto kukwinila milando hai.²⁴Kwaikiva Makilisito wa uhwangi na walota wamuhwangi watehika na kulangiha kilangihi kikulu na makangaso, kwa lukani lwa kubyodosa, paikawesekana hata na wahaghulwa.²⁵Mloli, niwayandala kwa hali pambila gha mighalu hai kumila.²⁶Kwa nagha, paikawelawatewalongela, "Kilisito kakuluvagha," mkotoho kuyenda haku kuluvagha. Au, 'Mloli, kamghati gha lighuta,' mkotoho kukwinila milando hai.²⁷Handa vila ladi inguvika lumuli kuhuma masaliki na kulangasa mbaka magalibi, ndiwa itewela kuhika kwa Mwana wa Adamu.²⁸Kokosi liwoneka likokolu lihova, haku ndiwa wanguwoneka kapungu.²⁹Ila bwitu badili gha lung'ai lukulungha machuwa ghala, lijuwa litetaywa lwisa, mwehi utehumisa ng'ogha mhana ghaki, ndondwa ziteguwa kuhuma kundumba, na makakala gha kundumba yatetikanyika.³⁰Ndiwa kilangihi kya Mwana wa Adamu itewoneka kunani, na makabila hyogha gha kumlimawogha watelumbilila. Watemlola Mwana wa Adamu akihika kumahindu gha kunani kwa makakala na ukwilikihi mkulu.³¹Atewalaghila watumikila wa kundumba wa Sapanga ghaki kwa lilowi likulunga gha lipembi, na weni watewakungula pamonga wahaghulwa ghaki kuhuma mbandi inne zya mlima, kuhuma mwihu mmonga wa kundumba mbaka mghangi.³²Mjivuli somu kukovekelana na libiki lya mtini. Lipindi bwitu liputula palitumbula kuchipula na kuhumisa mahamba, mngumanya yiwa kilangasi kya pabehi.³³Hinu hilahila, pamtelola mighalu hai hyogha, mngupalwa kumanya yiwa kapabehi, pabehi na mlyangu.³⁴Chakaka ninguwalongela, kiwelekwa haki kiteyenda ng'ogha, mbaka mighalu hyogha hai iteumila.³⁵Kundumba na mlima vitewela vityanga, ila milando ghangu iteyenda ng'ogha katu.³⁶Ila kulongelela lichuwa lila na lisaa kwahela mundu mweni kumanya, hata watumikila wa kundumba wa Sapanga, hata Mwana, ila Tati weka yaki.³⁷Handa vila iwonekelili lichuwa lya Nuhu, ndiwa itewela kuhika kwa Mwana wa Adamu.³⁸Kwaikiva kumachuwa hagma pambila gha lung'ai wandu walyeghili na kunywegha, wakiposa na kuposwa mbaka lichuwa lila livile Nuhu ayingilili ku safina,³⁹na wamanyile ng'ogha kindu chochosi mbaka lung'ai palihika na kuwakungula wogha- ndiwa itewela kuhika kwa Mwana wa Adamu.⁴⁰Ndiwa wandu waivili watewela kulitawa- mmonga atetolwa, na mghangi atelekwa kuhyetu.⁴¹Wadala waivili watewela wanguhyagha pamonga- mmonga atetolwa, na mmonga atehighala.⁴²Kwa nagha muweli mihu kwaikiva mmanya ng'ogha ni lichuwa ghani ivile atehika Bambu wa mwenga atehika.⁴³Ila mmanyi yiwa, ikiva bambu mweni lighuta angalimanya yiwa ni lichuwa ghani livile mwihi atehika, anagalikala mihu na angalilekesela ng'ogha lighuta lyaki kuvamilwa.⁴⁴Kwa nagha, hilahila mngupalwa kuliandala, Kwaikiva Mwana wa Adamu atehika kulisaa mliwachila ng'ogha.⁴⁵Hinu ni ghani

mwenikuwela mchakaka, mhusutu mweni malangu, avile bambu ghaki kampeghe ulongosi kwa wala wenikuwela mlighuta lyaki, ili awapeghi mulyo kwa lipindi lipalilwi? ⁴⁶Kahighilwa mtumikila hayu, avile bambu ghaki atekungini naye akighola ngagha lipindi paahika. ⁴⁷Chakaka ninguwalongela yiwa bambo atemvika kunani gha kila kindu kyaki. ⁴⁸Ila handa mhusutu muhakata pakalanga kumoyu ghaki, 'Bambu ghangu kakawila,' ⁴⁹na akatumbula kuwatova watumikila ghaki, na akalyegha na kulowela uyimbi, ⁵⁰Bambu wa muhusutu hayu atehika kulichuwa livile iwachililwa ng'ogha, na kulisaa kalimanya ng'ogha. ⁵¹Bambu ghaki atemdumula vipandi viiwili na kumvika kufwasi imonga ilandine na wambindingu, kuvile kutewela na kililo na kuhyagha malino.

25

¹Ndiwa unkosi wa kundumba utelandaniswa na wakawali ikumi wenikutola malimbamba ghau na kuhuka kuyenda kumpokela bambu wa uposo. ²Waitano paghati gha weni wawelili wanduyungi na waitano waghangi weni malangu. ³Wakawali wanduyungi pawatolile mimbamba ghau, watolile ng'ogha mahuta yoyosi. ⁴Ila wakawali weni malangu wakatola vyombu vyeni mahuta pamonga na mimbamba ghau. ⁵Hinu lipindi bambu wa uposo kakawila kuhika, wogha wakolilwe na lughonu na wakawonja. ⁶Ila lipindi lya uhiku wa mandandu kuwelili na lilowi, 'Uloli, bambu wa uposo! mhuiki panje mkampokeli,' ⁷Ndiwa hacha wakawali wakayimuka na kukosa mombamba ghau. ⁸Wala wanduyungi wakawalongela wala weni malangu, 'Mtu patili mayaghani hacha mahuta kwaikiva mimbamba gha twenga ingujimika.' ⁹Ila wala weni malangu wakawayanga na kuwalongela, 'Kwaikiva yatekwila ng'ogha twenga na mwenga, badili ghaki myendi kwa weni kuwusa mji hemileli mayaghani kwaikiva gha mwenga.' ¹⁰Lipindi wayenda kula kuhemela, bambu wa uposo akahika, na wogha wenikuliandala wakayenda naye kumhambu gha uposo, na mlyangu ukawopwa. ¹¹Kuulongo wala wakawali waghangi hilahila wakahika na kulonga, 'Bambu, bambu, utuwoposeleli.' ¹²Ila ayangile na kulonga, 'Chakaka ninguwalongela, Nenga niwamanya ng'ogha.' ¹³Kwa nacha muweli mihu, kwaikiva mmanyanya ng'ogha lichuwa hata lisaa. ¹⁴Kwaikiva ingulandine na munda paapalile kuwela na mwanja kuyenda mmbwani mmhanghi. Awakelimi wahusutu ghaki na kuwapegha unaisa ghaki. ¹⁵Mmonga wa weni amepghili talanta itano, mhanghi amoeghili ivili, na yula mhanghi amepghili talanta imonga. Kila mmonga apokelili kukovekalana na uwesa ghaki, na yula munda akayenda kumwanja ghaki. ¹⁶Njenji yula mweni kupokela talanta itano akayenda kughola biasala, na kumelesa talanta zighangi itano. ¹⁷Hilahila yula mweni kupokela talanta ivili, amelilisili zighangi ivili. ¹⁸Ila yula mhusutu apokelili talanta imonga, ayendili zyaki, akahimba liwumba kumlima, na kuifisa talanta gha bambu ghaki. ¹⁹Na badili gha lipindi litali, bambu wa wahusutu hacha ahikile na kughola mavalango. ²⁰Yula mhusutu mweni kupokela talanta itano ahikili na kuyegha talanta zighangi itano, akalanga, 'Bambu, umbeghili talanta itano. Uloli, nipokela fwaida gha zighangi itano.' ²¹Bambu ghaki akamlongela, 'Ughola maha, mhusutu mmaha na mchakaka! Uwela mchakaka kwa vindu mayaghani. Nitekupeghe ulongosi kunani gha vindu vitangala. Uyingili kuluheku gha bambu ghako.' ²²Muhusutu mweni kupokela talanta ivili akahika na kulonga, 'Bambu, umbeghili talanta ivili. Uloli, mbokela fwaida talanta zighangi ivili,' ²³Bambu ghaki akamlongela, 'Ughola maha, muhusutu wa maha na mchakaka! uela mchakaka kwa vindu vinung'una. Nitekupeghe ulongosi kunani gha vindu vitangala. uyingili kuluheku lwa bambu ghako.' ²⁴Kuulongo muhusutu mweni kuwela kapokela talanta imonga akahika na kulonga, Bambu, ningumanya yiwa wenga ni munda mkalipa. ungukonyola mahala ukulila ng'ogha, na ungubena mahala ukulila ng'ogha. ²⁵Nenga nitilili, nikayenda kuhigha talanta ghako kulutupi. Uloli, niwela naye hila unipeghili hinu nikupeghe, ²⁶Ila Bambu ghaki ayangile na kulonga, 'Wenga kwa muhusutu muhakata na mpweli, umanyili yiwa ningukonyola kumahala kuvile nikulila ng'ogha.' ²⁷Kwa nacha upalilwi kuwapegha mapesa ghangu wandu wa kubenki, na lipindi lya kuhuya kwa nenga ningalipokela hila ghangu na fwaida ghaki. ²⁸Kwa nacha mumpokoli hai talanta na mumpoghi yula muhusutu mwenikuwela na italanta ikumi. ²⁹Kila munda mwenikuwela nachu, ateyongeswa kupiti- hata kwa kuyongeswa nesu. Ila kwa yeyosi mwenim kuwela ng'ogha na kindu, hata kila kawela nachu atepokolwa. ³⁰Mumtaghi panje kulwisa hayu muhusutu wa maha ng'ogha, kuvile kutewela na kililo na kuhyagha malino. ³¹Lipindi Mwana wa Adamu paatehika kuukwilikihighaki, na watumikila wogha wa kundumba wa Sapanga pamonga na mweni, ndiwa atelikala kunani gha kikalilo kyaki kya ukwilikih. ³²Milima hyogha itelikungula kuulongo ghaki, na mweni atewalekanisa wandu, handa vila mhungaji anguwalekanisa kondolu na mbuhi. ³³Atewavika kondolu liwoku lyaki lya kuulumi, ila mbuhi atewavika liwoku lya sotu. ³⁴Hinu nkosi atewalongela wala wenikuwela kuliwoku lyakimlya kuliyila, 'Mhiki, mweni kuhighilwa na Tati ghangu, muulihi unkosi weni kuyandalwa kwaikiva gha mwenga kuhuma kuvikwa kwa mighomba gha mlomawogha. ³⁵Kwaikiva niwelili na njala na mnipeghili mulyo; Niwelili mhenja mnikemili kuukaya; ³⁶Nniwelili ngelengi, na mnivalisili nguu; Niwelili mvina na mkanivika maha; Niwelili mkihungu na mkanihikila. ³⁷Ndiwa weni haki watemuyanga na kumlongela, 'Bambu, ligha tukulolile yiwa uwelele na njala, na kukupeghe mulyo? Au uvile na uyumililo na tukakupeghe masi? Na ³⁸ligha tukulolile ukiva mhenja, tukakukema ukaya? Au uvile ngelengi na tukakuvika nguu? ³⁹Na ligha tukulolile ukiva mvina, au mukihungu, na tukakuhikila? ⁴⁰Na nkosi atewayanga na kuwalongela, 'Chakaka ninguwalongela, kila mkighola haku kwa mmonga wa walongo ghangu wanung'una, mnigholilile nenga.' ⁴¹Ndwaatewalongela hacha wenikuwela liwoku lyaki lya sotu, 'Muhiki kwa nenga, mwenga mlapililwi, myendi kulyoto lya machuwa yayendelela lyeni kuyandalwa kwaikiva gha lihyukana na mahoka ghaki, ⁴²kwaikiva niwelili na njala ila mnipeghili ng'ogha mulyo; Niwelili na uyumililo na mnipeghili ng'ogha masi; ⁴³Niwelili mhenja iala mnikemili ng'ogha kuukaya; nikiva ngelengi mnipeghili ng'ogha nguu; nikiva mvina na nikiva mkihungu mwenga mnivikili maha ng'ogha. ⁴⁴Ndiwa na weni hilahila watemuyanga na kulonga, 'Bambu, ligha tukulolile ukiva na njala, au uyumililili, au muhenja, au ukiva ngelengi, au ukiva mvina, au ukiva muwopwa, na tukutumikilila

ng'ogha? ⁴⁵Hinu atewayanga na kulongela, 'Chakaka ninguwalongela, kila mvile mkighola ng'ogha kwa wanung'una hagma, mnigholela ng'ogha nenga.' ⁴⁶Hagma wateyenda kuuhakilo wa machuwa yayendelela ila weni haki kuukomu wa machuwa yayendelela."

26

¹Lipindi Yesu pakamalila kulonga milando hyogha hai, awalongilile wavulwa ghaki, ²"Mngumanya yiwa badili gha machuwa maivili kutewela na mhambu wa Pasaka, na Mwana wa Adamu atetolwa ili ahakiliwi." ³Kuulongolo wakulu wa watambika na wagogolo wa wandu wakonganili pamonga kumahala gha Mtambika Mkulu, mwenikuwela ngukemwa Kayafa. ⁴Kwa pamonga wayandalile mighalu gha kumkamula Yesu kwa kuhigha na kumkoma. ⁵Kwaikiva walongile, "Ikotoho gholeka lipindi lya mhambu, lukani kukotoho kuhumila fuju paghati gha wandu." ⁶Lipindi Yesu paawelili ku Besania kulighuta lya SImoni Mkalawa, ⁷paawelili kalinyolosa kumesa, mdala mmonga akahika kwa mweni akiva kapapa mkebi wa alabasita yeni kuwela na mahuta gha mapesa yatangala, na akayitila kunani gha mutu ghaki. ⁸Ila wayitikila ghaki pawalolile mghalu hau, wahyomile na kulonga, "Niki lukani lwa hasala hai? ⁹Hagma mahuta yangaliwesa kuwuswa kwa mapesamyatangala na kupeghwa wangali hindu." ¹⁰Ila Yesu, akiva angulimanya hali, akawalongela, "Kwa kyani mngumghasa mdala hayu? Kwaikiva kaghola kindu maha kwa nenga. ¹¹Wangali kindu muwela nau machuwa hyogha, ila mtewela ng'ogha na nenga machuwa yayendelela." ¹²Kwaikiva pakayita mahuta ghala kunani gha mhigha ghangu, agholile nagma kwaikiva gha kusikwa kwa nenga. ¹³Chakaka ninguwalongela, kokosi Habali Maha hai paitetangaswa kumlimawogha, kitendu akigholile hayu mdala, hilahila kitewela kingulongelwa kwaikiva gha ngumbungumbu." ¹⁴Ndiwa mmonga wa wala ikumi na waivili, mweni kukemwa Yuda Isikalioti, ayendili kwa wakulu wa watambika ¹⁵na kulonga, "Mtenipegha niki panimhuka?" Wakampimila Yuda vipandi selasini vya feza. ¹⁶Kuhuma lipindi lila ahakulile fwasi gha kumhyuka. ¹⁷Hata lichuwa lya mtumbulo lya mibumunda itaywa ng'ogha simika, wavulwa wamuyendelili Yesu na kulonga, "Kugha ungupala tukuyandalili ulyeghi mulyo gha Pasaka?" ¹⁸Akawalongela, "Muyendi mbwani kwa mundu mtenu na mumlongeli, Mvula angulonga, " lipindi lyangu lipabehi. Nitetimilisa Pasaka pamonga na wavulwa ghangu kulighuta lyako." ¹⁹Wavulwa waghoolile handa Yesu vila kawalaghila, na wayandalile mulyo gha Pasaka. ²⁰Paihika lumihi, akatama kulyegha mulyo pamonga na wala wavulwa ikumi na ivili. ²¹Pawawelili wangulyegha mulyo, ailongile, "Chakaka ninguwalongela yiwa mmonga wa mwenga atenihyuka." ²²Wanyengemangili nesu, na kila mmonga atumbulile kumkunya, Ghuli, chakaka ng'ogha nenga, Bambu?" ²³Akawayanga, "Yula avile anguchwika liwoku lyaki pamonga na nenga kulibakuli ndiwa hayu atenihyuka. ²⁴Mwana wa Adamuatehuka, handa iyandikilwi. Ila chondi kwa mundu atemhyuka Mwana wa Adamu! Ingakiwela maha kwa mundu hayu handa angaliwelekwa ng'ogha." ²⁵Yuda, avile angalimhyuka akalonga, "Ghuli, Ni nenga Labi?" Yesu akamlongela, "Ulongile mghalu hau mweni." ²⁶Pawawelili wakilye gha mulyo, Yesu akatola libumunda, akalihighila, na kulipetula. Akawapegha wavulwa ghaki akilonga, "Mtoli, mlyeghi. Hau ni mhigha ghangu." ²⁷Akatola kikombi na kushukwile, akawapegha na kulonga, "Mnyweghi wogha kuhaki. ²⁸Kwaikiva hau ni mwahi gha lilaghano lyangu, weni kuyitwa kwaikiva gha watangala kwa mlekeselo wa sambu. ²⁹Ila ninguwalongela, nitelyegha ng'oghamkangi matungula gha msabibu hau, mbaka lichuwa lila nitenywegha hyonu pamonga na mwenga kunkosi wa Tati ghangu." ³⁰Pawawelili wayomola kuyimba uyimbo, wakahaka kuyenda kulitombi lya mzeituni. ³¹Hinu Yesu akawalongela, "Uhiku hau mwenga wogha mtelikwala kwaikiva gha nenga, kwaikiva iyandikwa, nitemtova mhungaji na kondolo wa lipinga watelekanika. ³²Ila badili gha kuhinduka kwa nenga, nitewalongola kuyenda Galilaya." ³³Ila Petelo amlongelile, "Hata paikawela wogha wtekulema kwaikiva gha mighalu itekukola, nenga nitekulema ng'ogha." ³⁴Yesu akamyanga, "chakaka ningukulongela, uhiku hau pambila gha njogholu kuguta, utenikanila mianja itatu." ³⁵Petelo akamlongela, "Hata ningalipalwa nihovi na wenga, nitekukanila ng'ogha." Na wavulwa waghangi wogha wakalonga handa ailongile Petelo. ³⁶Kuulongolo Yesu ayendili nau kumahala wangukukema Getisemane na awalongilile wavulwa ghaki, "Mlikali haku lipindi panihuka kula kuyupa." ³⁷Akamtola Petelo na wanga waivili wa Zebedayo na akatumbula kunyengemala na kung'ung'ulika. ³⁸Hinu akawalongela, "Mpumulo ghanu uvili na unyengemalo mkulu nesu, hata kuwesa kuhova. Mhighali haku na mkesi pamonga na nenga." ³⁹Akayenda kuulongolo mayaghani akaguwa kifulifuli, na kuluwa. Akalonga, "Tati ghangu, handa paiwesekana, ila handa vila ungupala wenga." ⁴⁰Akawayendela wavulwa na akawalola wawonja lughonu, na akamlongela Petelo, kwa kyani muwesa ng'ogha kukesha na nenga kwa lisaa limonga? ⁴¹Mkesi na mluwi lukani mkotoho kuyingila mmayeso. Mpumulo ungupala, ila mhigha uvile na ulepelelu." ⁴²Akayenda zyaki lianja lya ivili na kuluwa, akalonga, "Tati ghangu, handa mghalu hau uwesa ng'ogha kutyelembulika na ni lasima nikinywegheli kikombi haki, mapalo ghako yatimili." ⁴³Akahuya kangu na kuwalola wakiva wawonja lughonu, kwaikiva mihu ghau iwelili mitopeu. ⁴⁴Hinu akawaleka kangu akayenda zyaki. Akaluwa lianja lya itatu akilonga mighalu hilahila. ⁴⁵Kuulongolo Yesu awayendelili wavulwa ghaki na kuwalongela, "Mwambila muwonja hela na kulipumulisa? Mloli, lisaa lya pabehi, na Mwana wa Adamu anguhukwa kumawoku gha weni sambu. ⁴⁶Myimuki, tuhuki. Uloli, yula mweni kunihyuka kapabehi." ⁴⁷Lipindi paawelili ambila angulongela, Yuda mmonga wa wala ikumi na ivili, akahika. Lipinga likulunga likahika pamonga na mweni likihumila kwa wakulu wa watambika na wagogolo wa wandu. Wahikili na mapanga na vimbonga. ⁴⁸Kangu mundu mweni kuliwachila kumuhyuka Yesu awelili kawapegha kilanghi, akilonga, "Yula nitembusi, ndiwa mweni. Mumkamuli." ⁴⁹Bwitu akahika kwa Yesu na kulongela, "Jambu, Mvula!" Na akambusi. ⁵⁰Yesu akamlongela, "Ganja, ugholi lila livile likuyegha." Ndiwa wakahika, na kumunyolosele mawoku Yesu, na kumukamula. ⁵¹Uloli mundu mmonga mweni kuwela pabehi na Yesu, alangilile liwoku lyaki, akahomola lipanga lyaki, na akamtova mtumikila wa mtambika mkulu, na kumuhinja lipulukilo ghaki. ⁵²Ndiwa Yesu akamlongela, uhuyisi lipanga

lyako pala ulitolile, kwaikiva wogha wenikutumila lipanga wateyalamika kwa lipanga.⁵³ Mnguliwachila yiwa niwesa ng'ogha kumkema Tati ghangu, na mweni akaniyeghela watovangonde wapiti ikumi na ivili gha watumikila wa kundumba wa Sapanga?⁵⁴ Ila ng'ogha ni kwa uwesa ghani mayandiko yangaliwesa kutimiliswa, havi ndiwa ingupalwa kuumila?"⁵⁵ Lipindi hali Yesu akalilongela lipinga, "Ghuli! mhika na mapanga na vimbonga kunikamula handa mpokola? Kila lichuwa nitamili kulighuta lya Sapanga nikivula, na mnikola ng'ogha!"⁵⁶ Ila hacha hyogha yagholeka ili mayandiko gha walota yatimili." Ndiwa wavulwa ghaki wakamleka na kutula mbilo.⁵⁷ Wala wamkamulile Yesu wakamyegha kwa Kayafa, Mtambika mkulu, mahala kuvile wayandika na wagogolo wawelili walikungula pamonga.⁵⁸ Ila Petelo amkovekelile kwa kuhyetu kwa utali mbaka kulyugha lya Mtambika mkulu. . Akayingila mghati na kutama pamonga na waghokela aloli kila kitehumila.⁵⁹ Hinu wakulu wa watambika na njengakaya hyogha wawelili wakihakula uhighilisitu wa uhwangi kwa Yesu, lukani wapati kumkoma.⁶⁰ Pamonga na yiwa wajiyegehili wahighilisa watangala, ila wapatile ng'ogha njila njila yoyosi. Ila kuulungolo waivili wajiyegehili kuulungolo⁶¹ na kulongela, "Mundu hayu alongile, "Ninguwesa kubomola lighuta lya Sapanga na kulichenga kangi kwa lichuwa limonga."⁶² Mtambika mkulu akagholoka na kumkonya, "Uwesa ng'ogha kuyanga? Hacha wanguhighilisa niki kwa wenga?"⁶³ Ila Yesu atamili nuu. Mtambika mkulu akamlongela, "Handa Sapanga vila angulama, ningukulaghila utulongeli, handa wenga ni Kilisito, Mwana wa Sapanga."⁶⁴ Yesu akamuyanga, "Wenga mweni ulonga kala mghali hau. Ila ningukulongela, kuhuma hinaa na kuyendeleva utemlola Mwana wa Adamu katama liwoku lya kuliyila lyeni makakala, na paatehika kumahindu gha kundumba.⁶⁵ Ndiwa mtambika mkulu akabalula nguu zyaki na kulonga, "Kalighu! Ghuli, tungupala kangi uhighilisitu wa niki? Mloli, myoghanila kala malighu."⁶⁶ Ghuli! Mnguliwachila niki? Wakayanga na kulongela, "Angupalwa ahovi."⁶⁷ Hinu wakamuhunyila mata kuwuso na kumtova mbandi, na kumtova na mawoku kumlomu kwa mawoku ghau,⁶⁸ na kulongela, "Uloti, wenga Kilisito. Ni ghani kakutova?"⁶⁹ Lipindi hali Petelo awelili kalikala panji kulikuta, na mtumikila mdala amyendelili na kulonga, "Wenga hila hila uwelili pamonga na Yesu wa Galilaya."⁷⁰ Ila akanili kuulungolo gha wogha, akilonga, nikimanya ng'ogha kila mkilongile."⁷¹ Paayendili panje gha mlyangu, mtumikila mghang mdala amlole na kumlongela wawelili pala, "Mundu hayu hila hila awelili pamonga na Yesu wa Nazaleti."⁷² Akakanila kangi kwa kilapo, "Nenga nimanya ng'ogha mundu hayu."⁷³ Lipindi lihupi kuulungolo, wala wawelili waghokela pabehi, wamyendeli na kulongela na Petelo, "Kwa chakaka wenga hila hila nimmonga wa weni, kwaikiva hata vila ungulungela ni uhighilisitu."⁷⁴ Ndiwa akatumbula kulapa, "Nenga nimanya ng'ogha mundu hayu," na lipindi lilalila njogholu akatova lilowi.⁷⁵ Petelo akakumbwika milando alongililwi na Yesu, "Pambila gha njogholu kutova lilowi utenikanila mianja itatu."

27

¹Lipindi lya malawila palihika, wakulu wogha wa watambika na wagogolo wa wandu wachengili njila kwa Yesu wapati kumkoma.² Wakamuwopa, na kumvika kuulungolo kumyegha kwa mlamula Pilato.³ Hinu lipindi Yuda, avile awelili kamhyuka, alolile yiwa Yesu kalamulwa kala, akalijutila na kuhuyisa vipandi iselasini vya feza kwa mkulu wa watambika na wagogolo, ⁴na akalonga, "Nighola sambu kwa kuhuyika mwahi uwela ng'ogha na uhakata." Ila wakayanga, "Ingutufwaa niki twenga? Uyaloli hacha mweni."⁵ Hinu akatagha pahi lila vipandi vya feza kulighuta lya Sapanga, na kuhaka zyaki na kuyenda kuikoma kwa ng'oi.⁶ Mkulu wa watambika akatola vila vipandi vya feza na kulonga, "Ng'ogha maha kuvika feza hai kungoku, kwaikiva ni mahipo gha mwahi."⁷ Wakalongelana kwa pamonga na feza hila wakaitumila kuhemela litawa lya lutupi likemwa mfinyanzi lya kusikila wakenja.⁸ Kwaikiva gha nacha litawa hali likawela likikemwa, "Litawa lya mwahi" mbaka lelo hai.⁹ Hinu lila lilando liwelili lilongelwa na mlota Yelemia likatimila, kulonga, "Watolile vipandi isilini vya feza, mahipo yayandalwa na wandu wa Izraeli kwaikiva gha mweni,¹⁰ na watumilile kwa litawa lya lutupi lingukemwa mfinyanzi, handa Bambu vila awelili kanilongela"¹¹ Hinu Yesu agholokili kuulungolo gha mlamula, na mlamula akamkonya, "Ghuli! Wenga ni nkosi wa Wayahudi?" Yesu amyangili, "Wenga ungulonga nacha."¹² Ila lipindi pakasitakiwa na wakulu wa watambika na wagogolo, kayanga ng'ogha chochosi.¹³ Hinu Pilato akamlongela, "Uyughanile ng'ogha masitaka hyogha kwa wenga?"¹⁴ Ila kamyanga ng'ogha hata lilando limonga, hinu mlamula akamemwa na kulikangasa.¹⁵ Hinu kumhambu iwelili ni ndyangilu ghau mlamula kumuwoposola muwopwa mmonga mweni kuhaghulwa na lipinga.¹⁶ Lipindi hali wawelili na muwopwa mkola mlima lihina lyaki Balaba.¹⁷ Hinu lipindi pawawelili walikungula pamonga, Pilato awakonyile, "Ni ghani mngupala tumuwoposoli kwaikiva gha mwenga?" Balaba au Yesu mweni kukemwa Kilisito?"¹⁸ Kwaikiva amanyile yiwa wamkamula kala kwaikiva gha umbindingu.¹⁹ Lipindi paawelile akitama kukikalilo kyaki kya ulamulo, mhumbu ghaki akamyeghela lilando na kulonga, "Ukotoho kughola mghali wowos kwa mundu hayu mweni kuwela ng'ogha na uhakata kwaikiva nihakilwa nesu hata lelo kundotu gha uhiku kwaikiva gha mweni."²⁰ Ndiwa wakulu wa watambika na wagogolo wakawachongesela makongano wamluwi Balaba, na Yesu akomwi.²¹ Mlamula akawakonya, "Ni ghani paghati gha waivili mngupala nenga nimlekeseli kwa mapalo gha mwenga?" Wakalonga, "Balaba."²² Pilato akawalongela, "Nimgholeli niki hayu Yesu mweni kukemwa Kilisito?" Wogha wakayanga, "Avambwi."²³ Na mweni akalonga, "Kwa kyani, ni uhakata ghani kaghola?" Ila wayenendeleva kutova lilowi hata kunani nesu, "Umhakili."²⁴ Hinu Pilato pakalola kanguwesa ng'ogha kughola lolosi, ila badili ghaki ni fuju ziwelili zitumbula, akatola masi akawofula mawoku ghaki kuulungolo gha lipinga, na kulongela, "Nenga nivile ng'ogha na uhakata kwa mwahi gha mundu hayu mweni kuwela ng'ogha na uhakata. Myaloli hacha weni."²⁵ Wandu wogha wakalonga, "Mwahi ghaki uweli kunani gha twenga na wana wa twenga."²⁶ Hinu akamuwoposola Balaba kwa weni, ila amtovili hyatu Yesu na kumyegha kwa weni kuyenda kuhakilwa.²⁷ Hinu watovangonde wa mlamula wakamtola Yesu mbaka Ploitolio na lipinga likulunga lya watovangonde wogha wakalikungula.²⁸ Wakamuwoposola nguu zyaki na

kumvika lihabiti lya langi ngeli. ²⁹Hinu wakaghola likokoma lya mihomi na kulivika kunani gha mutu ghaki, na wakamvikila lidengi kuliwoku lyaki lya kulumu. Wtovili manung'una kuulongolo ghaki na kumpughanya, wakilonga, "Jambu, Nkosi wa Wayahudi!" ³⁰Na wakamuhunyila mata, na watolile lidengi na kumtova kumutu. ³¹Lipindi pawawelili wakimpughanya, wamuwoposolili lila lihabiti na kumvika nguu zyaki, na kumlongosa kuyenda kumhakili. ³²Pawahuma panji, mundu kuhuma Kilene lihina lyaki simeoni, avile wamlasimisili ayendi pamonga na weni ili apapi lipingika lyaki. ³³Pawahikili kumahala wangupakema Goligota, kungumaanisa, "Mahala gha fufu lya mutu." ³⁴Wakampegha siki yeni kuhaghanywa na nyongo anyweghi. Ila paaiyesili, kawesa ng'ogha kuinywegha. ³⁵Lipindi pawawelili wangumuhakila, wakapeghana nguu zyaki kwa kuvalangilana vindu wanguvikema mihu gha mlungu. ³⁶Na wakatama kumlola. ³⁷Kunani gha mutu ghaki wawikili masitaka ghaki yakisomeka, "Hayu ni Yesu, nkosi wa Wayahudi." ³⁸Wapokola waivili wavambilwi pamonga na mweni, mmonga mbandi gha kuliyila na mghangi mbandi gha soto ghaki. ³⁹Wala wenikuwela wangutyanga mnjila wampughanyili, wakitika mutu ghau ⁴⁰na kulongela, "Wenga mwenikuwela ungupala kubomola lighuta lya Sapanga na kulichenga lipindi lya machuwa maitatu, ujilokoli mweni! Handa ni Mwana wa Sapanga, uhuluki pahi uhuki lulipingika!" ⁴¹Ku hali hilahila wakulu wa watambika wawelili wakimpughanya, pamonga na wayandika na wagogolo, na kulonga, ⁴²"Alokolili waghangu, ila kawesa ng'ogha kujilokola mweni. Mweni ni Nkosi wa Wayahudi. Na ahuluki pahi kuhuma kulipingika, ndiwa tutemkwini." ⁴³Amtumainili Sapanga. Uleki Sapanga amlokoli hinaa handa angupala, kwaikiva alongile, 'Nenga na Mwana wa Sapanga.'" ⁴⁴Na wala wapokola wawelili wavambwa pamonga na mweni hilahila walongile milando gha kumpughanya. ⁴⁵Hinaa kuhuma isaa isita kuwelili na lwisa kumlima wogha mbaka isaa itisa. ⁴⁶Paihikili isaa itisa, Yesu akalila kwa lilowi likulunga, 'Eloi, Eloi, lama sabakitani?' Akimaanisa, "Sapanga ghangu, Sapanga ghangu, kwa kyani unileka?" ⁴⁷Lipindi lila amonga gha weni wawelili waghologa pala wayoghanile na wakalonga, "Angumkema Eliya." ⁴⁸Bwitu mmonga mmonga wa weni akatula mbilo kutola sifongo na kuimemesa kumlomu kikalipa, akaivika kunani gha libiki na kumpegha apati kunywegha. ⁴⁹Na wala wahighalile wakalonga, "Mumleki weka yaki, mleki tuloli handa Eliya atehika kumlolola." ⁵⁰Hinu Yesu akalila kangu kwa lilowi likulunga na kuhumisa mpumulo ghaki. ⁵¹Uloli, lipazila lya lighuta lya Sapanga libalukili mbandi ivili kuhumila kinani mbaka pahi. Na mlima ikahihimila na mighomba ikabaluka vipandi. ⁵²Mamambi yakawoposoka, na mindumbi gha wambuleti watangala weni kuwela wawonjile lughonu wahindulilwi. ⁵³Wakahuka kuhuma mmamambi badili gha uhindulo ghaki, wakayingila mlima mmbuleti, na wakawoneka na wandu watangala. ⁵⁴Hinu yula mlamula na wala wenikuwela wakimlola Yesu walolile mhihimilo na mighalu yenikuwela ikihumila, wakamemeswa na holu nesu na kulongela, "Chakaka hayu awelili mwana wa Sapanga." ⁵⁵Wadala watangala wenikuwela wakimkovekela Yesu kuhuma ku Galilaya ili kumtumikila wawelili pala wakilola kuhuma kutali. ⁵⁶Paghati ghau awelili Maliamu Magdalena, Maliamu nyongo ghaki Yakobo na Josefu, na nyongo wa wana wa Zebedayo. ⁵⁷Paihikili lumihi, ahikile mundu mnaisa kuhuma ku Alimatayo, mweni kukemwa Yusufu, avile hilahila awelili mvulwa wa Yesu. ⁵⁸Amyendelili Pilato na kuluwa mhigha wa Yesu. Hinu Pilato akalaghila apati kupeghwa. ⁵⁹Yusufu akatola mhigha akauwopa na nguu gha Sufi maheli, ⁶⁰na akauwonjesa kulimambi lihyonu lyaki awelili kalihongola kumghomba. Hinu akabimbilisa liganga likulu likawopa mlyango wa limambi na akayenda zyaki. ⁶¹Maliamu Magidalena na Maliamu mghangi wawelili pala, walikala kwa kulola limambi. ⁶²Lichuwa lyahika ivile iwelili lichuwa badili gha mayandalo, wakulu wa watambika na Mafalisayu wakonganikili kwa pamonga kwa Pilato. ⁶³Wakamlongela, "Bambu, tungukumbwiki yiwa lipindi yula mhwangi paawelili mkomu, alongile, 'Badili gha machuwa itatu atehinduka kangu.'" ⁶⁴Kwa nagma, ulaghili yiwa limambi ligholokelwi maha mbaka lichuwa lya itatu. kihyetu kyaki, wawulwa ghaki wanguwesa kuhika na kumuhija na kulongela kwa wandu, 'Kahinduka kuhuma kukihu.' Na uhwangi wa kumwihu utewela mhakata kupiti hula wa mtumbulo. ⁶⁵Pilato akawalongela, "Mtoli waghologela. Myendi mkaghali hali gha usalama handa vila mnguwesa kughola." ⁶⁶Hinu wayendili na kughola limambi kuwela maha, liganga litovilwi muhuli na kuvika waghologela.

28

¹Kuulongolo lumihi lichuwa lya Mbumulilo, lijuwa paliwelili likichia kuyendela lichuwa lya mtumbulo lya lijuma, Maliamu magadalena, na yula maliamu mghangi wahikili kulolile limambi. ²Uloli kuwelili na mhihimilo mkulu. kwaikiva mtumikila wa kundumba wa Sapanga ahulukili na kulibingilisa lila ligamba, na hinu akatama kunani ghaki. ³Wuso ghaki uwelili handa umemi, na nguu zyaki ziwelili mbuleti handa seluji. ⁴Wala waghologela wamemesilwi na holu na kuwela handa wahova. ⁵Yula mtumikila wa kundumba wa Sapanga akawalongela wala wadala akilonga, "Mkotoho kutila kwaikiva ningumanya yiwa mngumuhakula Yesu, mweni kuvambwa. ⁶Kang'ogha haku, ila kahinduka handa awalongilile. Mhiki mloli mahala pawelili Bambu awonjili. ⁷Myendi kwa kuloposela mkawalongeli wawulwa ghaki, 'Kahinduka kuhuma kukihu, uloli kawalongola ku Galilaya. Haku ndiwa mtemlola.' Uloli nenga niwalongela." ⁸Wala wadala wahukili pala kumamambi kwa kuloposela wakiwela na holu na luheku lukulungwa, na wakatula mbilo kuwalongela wawulwa ghaki. ⁹Uloli Yesu akakongine nau na kulongela, "Jambu." wala wadala wakahika na kukola maghulu ghaki, na kangu wakamtundamila. ¹⁰Hinu Yesu akawalongela, "Mkotoho kutila, myendi mkawalongeli walongu ghangu walongoleli ku Galilaya. haku watenilola. ¹¹Lipindi wala wadala pawawelili wakiyenda, uloli amonga gha waghologela wayendili kumbwani na kuwalongela wakulu wa watambika mighalu hyogha iwelili ihumila. ¹²Na weni watambika pawawelili wakongine na wagogolo na kulongelela mghalu hau pamonga, wakayegha mapesa ghatangala kwa wala watovangondo ¹³na kuwalongela, "Muwalongeli waghangi yiwa, 'Wawulwa wa Yesu wahikili uhiku wakauhija mhigha wa Yesu lipindi twenga tuwolili tuwonja.'" ¹⁴Handa mghalu hau utemuhikila mlamula, twenga tutemkwegha na

kuwahumisila mwenga holu hyogha." ¹⁵ Hinu wala watovangondo wakatola ghala mapesa na kughola handa vila walongelilwi waghohi. Habali hai ikalandala nesu kwa Wayahudi na ikawela nagma mbaka lelo. ¹⁶ Ila wala wandumindumi ikumi na mmonga wayendili ku Galilaya, kweni lila litombi awelili kawalaghila. ¹⁷ Na weni pawamlolile, wakamtundamila ila amonga gha weni walolile holu. ¹⁸ Yesu akahika kwa weni akawalongela akilonga, "Nipeghwa ulongisi wogha kumlima wogha na kundumba. ¹⁹ Hinu muyendi mkawaghohi milima hyogha kuwela wavulwa. Muwabatasi ku lihina lya Tati, na lya Mwana, na lya Mpumulo Mmbuleti. ²⁰ Muwavuli kutundmila mighalu hyogha niwalongilile, na uloli, nenga na pamonga na mwenga machuwa yayendelela., hata mbaka mwihu wa mlimawogha